

笠澤詞徵

百尺樓叢書

卷十一

邑後學 陳去病輯錄

清

袁 棠字尚木一字甘林又字无咎號湘湄國學生嘉慶元年丙

辰舉孝廉方正有洮瓊館詞濃睡樓詞郭慶云湘湄學詞後于

篤及成而且工也倍於余雅自矜貴非意所欲為與為之而不
能出人輒棄去故所存不半余而卓然可傳所謂上之高唐洛
神下亦子夜讀曲之遺者也舊藏宋帝賜周益公洮瓊研希世
之寶也故以名其館及詞去病案吾邑詩人向以唐代為宗
至葉橫山更倡忌熟宜生之說歸愚沈氏因之以撰歷朝別裁
由是松陵詩派不特嬗衍吳中且及天下其弟子袁朴村景輅
又本其旨成詩徵一書即湘湄父也師承家學源遠流長宜乎
獨秀一時為詞林宗匠惜後嗣零謝遺書並亡去歲臘又因
失慎致詩徵等板盡付灰燼真吾鄉文獻一浩劫也編纂既竟不禁擲筆三歎時甲寅三月

菩薩蠻

薄雲流過疏疏雨亂蛩堆裡尋秋去茅屋半依村夕陽紅到門不

知嵐翠積只覺蕉衫溼如此好烟蘿昏雅寒奈何

清平樂

屋山如許合有秋心貯底事圍墻高過樹蝶夢也都闌住 禁佗幾
陣東風杏華吹落生紅春在不分明處一天曉雨溟濛

鳳凰臺上憶吹簫 書青溪惆悵卷後

巷樹鈎衣陌花闌馬幾曾直得魂銷只石城艇子打槳堪邀猶是薄
眉緩鬢疏簾底人畫南朝難忘處酒邊低唱暮雨蕭蕭 迢遙夢魂
來也六百里關河少箇輕橈怕白門秋柳分瘦宮腰何況那時送別
憐扶病骨比香桃重回首斜陽亂山一片寒潮

渡江雲 自燕磯放船至京口夜泊不寐憶戊申仲秋偕鐵門

頻伽同舟聯句江月依然故人在遠余懷渺渺情見乎詞矣
津頭猶疊鼓舵樓晚飯落日一帆懸半川霞散綺著色山多金碧煖

蒸烟誰拈鐵笛向中流吹暝魚天剛幾點松梢墮火京日照停船
依然濤聲破睡篷背聽秋只盟漚人遠猶記得坐來鐺脚對聳詩肩
舊題重省昏於夢覺而今老大堪憐江月底腸迴二十年前

偷聲木蘭花 彭城行館丁夜聞笛

霜華微糝苔痕皴露井月來秋樹瘦長夜漫漫鐙影蟲聲各自寒
誰家玉笛高樓上不睡知佗愁底樣也怕淒清欲歇還吹一兩聲

河傳

春曉雨小陰陰院宇落紅多少聽他雙燕呢喃闌干東風寒不寒
欠申微度吹蘭息香幃揭小玉低聲說略從容下簾櫳休慵羅衣添
一重

清平樂

月斜花暗一作短尋到深深院水榭風廊一作約三四轉夢近不知人

遠 投懷一笑含情頰窩兩點分明底事朝來相見依然脈脈生生

巫山一段雲

吹淚和花落團愁作絮飛子規只傍畫樓西郎邊啼不啼 歲歲天

涯蓬轉可奈越飄越遠歸期近在畏書來書來未擬回

賀聖朝 春水和青庵

漲痕潑綠連芳草載得落紅多少惜春丁詞綜作花借問可迴流便迴流

也小丁作縱迴流春杏浮漚易散浮萍難合已如今了拚丁作油花空卜魚書空寄望歸

船不年年歲歲做清明丁作穀波生篋中詞波又作紋只湔裙人老譚獻云觀河面皺之歎

沁園春 柳

辛苦東風約綠回黃搓絲染條念腰身苦苦瘦圍禁捻眉痕淺淺好

樣偷描羌笛一聲陽關三疊裙帶同心綰不牢慵開眼看車迴馬去

亭子勞勞 河橋迴首迢迢更何待秋來魂黯銷只天涯孤夢春隨

絮遠門前流水人逐萍飄難忘湔裙那時解珮一線青拖小翠翹重
經過怕折殘枝長還比樓高去病案此詞爲婢柳三多作初三多隨
嫁來先生家及長歸母家其家居金陵
先生雖欲留之而無如何也
及後仍訪得之乃聘以還

貂裘換酒 爲頻伽題寒壚買醉圖

誰畫荒寒景但蒼蒼暮雲一片亂峯齊暝幾陣槃鴉催風急又作去
江干霜信況遊子衣單誰省淒緊客懷無着處只山樓一角斜陽賸
紅樹外酒旗影 題名重向壚頭認算青衫十年著破轉蓬無定莫
更當杯歌慷慨擁髻清愁未醒定說到漳濱人病舊雨不來前塵在
也依稀鄰笛山陽聽題此卷誌我幸

春光好

山點黛水拖藍畫船閒九十韶光三月好又初三 撐過赤闌橋畔
碧桃花未闌珊雨意濛濛風略略試春衫

唐多令 題家蘭村南園春夢圖

芳草別成叢天桃作意紅
奈梢頭啼鴉忽忽賸有護花旛
一扇遮不住四來風
回首彩雲空含情賦惱公
冷思量微雨溟濛元九腸迴
枝拂面長自繞粉牆東

連理枝 寄蘭村札題後

不恨逢君晚不恨離君遠
只恨萍踪江湖滿地別君飄轉便鯉魚六
六解傳書寫新愁難徧
前夜朱方館昨夜長洲苑
今夜扁舟載丸涼月鴛鴦湖畔料津亭郭店盡教知惹夢魂亂

卜算子 留宋于庭翔鳳

昨日望君來今日愁君去
高帆一峭卽天涯卜夜留君住
莫惜剪寒燈莫惜聽疎雨
還勝清宵不夢君坐到紗窗曙

清平樂

畫縷閒倚人影了簾底些子前塵如夢裡屈指一星終矣 露臺水
榭空濛闌干一段猶紅聽得燕兒傳語飛花曾怨東風

浪淘沙

迷路得花看暫解雕鞍繡絲門巷雨漫漫借問小姑團扇上誰畫雙

鸞一作可
畫乘鸞

山果配蔬盤菰脆梅酸隔窗

牆一作

燈影夜闌干閒煞半

牀青綺被各自宵寒

如夢令

墻角桐陰初轉裊盡鴨爐香篆病起懶梳頭恰恰畫簾低卷人遠人
遠風颺落花庭院

鳳凰臺上憶吹簫

鶴市斜街雞陂對岸望齊門在中間悵碧天如夢紫玉成煙還記樓
臺臨水新楊柳一一絲牽凝眸認人家不是高樹依然 年年黃昏

客到手顫繡牀燈笑近窗前奈今宵泊處仍傍闌干賸有當時月子
蛾眉樣來照孤眠淒涼聽城頭角聲吹曉霜天

沁園春 題纖纖夫人小楷與竹士聯句次和鐵門詩帖

十二層城青鳥飛來飄如墜雲喚碧天佳偶駭牛痴女紅繩恨事新
婦參軍此舉出奇幾生修到璧合珠聯一對人平生幸縱青綾遲謁
綠簡先分 唱酬枉自紛紜只一幅瑤牋妬煞君想潑茶懷裏賭徵
故典挑絲機上同製回文寫韻殘毫畫眉剩墨扶病銀鈎瘦有神教
纖手快翔鸞錦裏辟蠹香熏

南樓令 白門使院桐花下作

濃綠結陰涼疏花作穗長漏苔階點點斜陽隔院不知誰拜月飄一
縷水沈香 團扇記追涼輕容玉色裳倚梧桐冷著思量一樣黃昏
人立地多幾曲短迴廊

酷相思 春雪和陳竹士金纖纖聯句之作

一片癡雲樓上閣捲不去東風弱聽鸚鵡遙呼團扇撲粉蝶也無人
捉柳絮也無人捉 睡起來羅寒漠漠錦半臂猶嫌薄正六扇玻璃
窗隔著只道是梅花落只道是梨花落

南鄉子 得頻伽徐州書

遠夢極河干淮雁傳書滯羽翰瞥見紅泥鈴印好平安未抵離愁一
半寬 火急剔燈看山色雲龍寫寄難紙尾却題詩勸我加餐說道
西風漸漸寒

摸魚兒 頻伽屬題盟漚圖卽送其移家魏塘

算江鄉分明最好金風亭長曾賦吳根越角迷離處浩蕩煙波如許
誰畫取只一片鱗鱗雲影濛濛樹提鷗挈鷺記載酒人來持螯節近
花外數聲鶻 頭銜署三十六鷗盟去做廬聊蔽風雨比隣鵝鴨偏

相惱負了水邊窗戶君且去歎我亦年來厭蹋閒塵土蜻蛉買否便
稚子敲針山妻結網一權傍君住

木蘭花慢 爲吳子珮瓊仙夫人題天平攬勝圖并調山民

羨繡襦甲帳神仙婿比鶉鶉儘山補眉圖月修簫譜看錫花銜掀簾
生衣初試畫隄長風軟燕呢喃家具兩頭恰坐曉寒半臂同添 洄
沿略似米家船小泊浪花恬正柳拖濃翠萍鋪嫩碧雨盡江南厭厭
連天芳艸似綠雲扶屐上峯尖好向蓮花趺坐有人合十來參

蓮花
峯爲

天平最
高處

南樓令 紀別

載月返梁溪看潮又浙西對殘紅絮語依依問了行裝問童僕還再
四問歸期 落月畫檐低鄰鷄不住啼到臨分又勸添衣才出中門
呼小住怕門外曉風淒

滿江紅

春到花朝恰九十平分一半風光好湔裙節近賣餠天暖曉雨乍晴
新水健午煙低裊游絲軟待紅襟燕子覓巢來簾齊捲 可憐色眉
梢淺堪恨事心頭滿揀小名應錄落紅零亂苦海易沈凡骨重遙山
小謫華年短儘梧桐焦尾燭灰心天休管

淒涼犯 爲紫珊題瘞花圖

籜龍夜嘯苔茵襯斑斑滿徑難埽避風天遠埋憂地窄有人悽抱拾
香重到賸闌角殷勤晚照悄羅裙泥金蛺蝶低向落英吊 不待鶯
聲老一片才飛滅春恁早深憐暗惱便舒衫受他多少葬玉深深更
莫化紅心宿艸算韶光一百五日尙未了

疏影 梅花帳額

幽香四幕祇一枕羅浮蝶夢初卽數幅輕綃圍住春風不知今夕何

夕九華七寶空華貴怎占斷江南春色愛醒來骨冷魂清樸眼月痕
斜入映徹苔枝瘦影落花拂不去閒想宮額寫入橫圖淡墨疏圈
那怯江城吹笛還擬九九消寒譜較幾點燕脂紅浥待海棠聘取芳
時莫遣睡鄉孤寂

踏莎行 秋晚借蓉裳伯夔蘭村泛舟莫愁湖同賦一闋

鬢渚黃塗蓼汀脂印一窺激碧圓于鏡隔城山色遠浮眉黛痕略略
秋來損 棲燕梁空銜蟾樓迥六朝何處停橈問只他湖水不通潮
未應銷盡殘金粉

瑞鶴仙 歲莫得內子書感賦

夜長歸夢短伴飢鼠窺燈殘蟾侵幔旅愁正難遣更墮地聲寒飛來
清怨心隨雁遠算歷歷津亭郭店自扁舟北渡滄江回首亂山遮眼
縈念故鄉歲歉儲粟罄虛質錢書賤魚牋乍展驚病起筆踪輒空

函悔寄炊珠焚桂却仗持門婦健想貧家黃葉青苔爨煙盡斷

霜天曉角 夢內子簪卿

秋老天涯渡江歸夢賒
儂指刀環誤後知幾度
卜燈花 堆雅鬢影
斜隔窗疑是佗
只是覺來閒想何不勸早還家

金縷曲 京口訪駱佩香夫人綺蘭乞畫

盧駱才名舊隔青紗形神俱服
幾人劉柳門外亂山低亦好
合向妝樓俯首更下拾半江星斗
一霎海風吹白雨雜仙心詩句
和秋瘦燈影颭小於豆
去年三度征帆驟望魚天雲窗霧閣
還容到否塵土滿身仙分薄風引輕舟
偏又正泊處沙寒潮溜定惜拒霜花落去向
生綃小試留春手傳粉本短屏繡

夜行船 春人綰髻圖同頻伽作

滿院熏人花氣愁未醒
恁懨懨地臨妝略略手盤鴉
飄一縷墜雲慵

理 記得秋孃十三四學梳頭水精簾底如何已是沒心情便愛相
不聊生髻

任兆麟字文田號心齋國子生

震澤籍

嘉慶初元舉孝廉方正箸有

心齋詩稿有竹居集

鳳皇臺上憶吹簫 題散花女弟浣紗詞卷自度腔

碧牕人悄寶篆香微荳蔻心紅漫撚恨舊夢無憑新愁難翦亦知第

一損人爭還奈風光無限劇可憐起自徘徊眠還輾轉 誰伴才子

風流疊新詞錦字香生蘭畹這幽恨離情種種移人魂斷吟遍月樓

風徑只恁處天涯人遠人遠也怕是綠新紅晚

下半用元人吳元可填本

柳棄疾云散花爲長洲沈縷一字蕙孫自號玉香仙子祁門教諭起鳳女諸生林衍潮室工詞賦及駢體文善吹洞簫著有翡翠樓詩文集簫譜其浣紗詞中有鳳皇臺上憶吹簫自度腔題簫譜後奉呈心齋先生并東吟榭諸姊妹云香沈宿雨簾捲秋陰偶譜宮商花底正人對青峯幽思難寄幾處高閣春寒併吹落玉簫聲裏憶當年縹緲秦樓依依如縷堪喜月夕花晨想草堂詞伯引商刻

徵訝寂寂梨花盈盈溪水一番別恨離情都寫入碧雲清吹且試
 得新譜閒裁闌干留倚自註寄清溪伯姊詩中有梨花溪水之句
 先生編入譜中又青玉案落梅和心齋先生作云何人吹徹江城
 笛便吹落瓊瑤屑曲徑閒過春寂寂窗前影散階前香冷空照嬋
 娟月昨宵猶記開瑤席今夜相思誰共說楚些歌殘招未得翠苔
 深處紅茵鋪箇夢與冰魂接又長洲尤澹仙曉春閣詞有青玉案
 寄呈心齋先生云新涼夜散梧桐樹高閣捲簾凝佇人隔兼葭誰
 共語風前短笛柳稍殘月盡是牽愁處浮雲富貴何堪數轉瞬韶
 華不如故去去仙源尋舊路青衫雪鬢紅裙淚眼總被多情誤澹
 仙字素蘭一字寄湘工詞賦及駢體文年十八名列吳中十子甘
 泉江珠青菴閣詞有鳳皇臺上憶吹簫和心齋大兄題蕙孫妹浣
 紗詞卷作云雲母窗深水晶簾靜吟來好句難酬粲銀鈎小字巧
 語鶯偷爲惜光風窄窄怎禁得如許閒愁腸斷也珊瑚敲折無地
 埋憂撥畔落紅陣陣遣遊絲斷絮爭上眉頭是書生不櫛獨擅風
 流贏得青衫溼透都付與檀板清謳頻回首簫聲縹緲何處秦樓
 珠字碧岑號小維摩監生藩妹諸生吾學海室工詞賦尤長駢體
 文通經史並善舞劍著有
 青菴閣詩文集小維摩集

前調

夢裏談禪醉中學道幾曾堪著浮生詫

丁詞綜補作訝

難傾情海不下

丁作破

愁城又是春光如許燈黯黯冷掩銀屏獨自向窗兒守着怎得天明

難平古來才子嘆紅粉青衫一例飄零教新聲翻出爭逗芳情丁

古今一例算青衫紅粉總合妬殺五更風雨驚曉看紅墮簾旌凭闌

也清明又近丁作清明近隔院簫聲昨過小寶晉齋散花出示寄懷

紅雨到清明之句小維摩謂標致逼真晚唐潘

青藜閣詞鳳皇臺上憶吹簫再和心齋云盤盤雲箋行行鮫縠令

人咄咄書空把新詞吟遍欲和難工別盡殘鏡聽雨真負却作達

心胸一滴滴聲隨腸斷淚染綃紅朦朧模糊病眼看五色離迷頭

前調

客裡風光愁中歲月等閒春色三分是瑤華重贈錦字生新攪殺別

魂離魄來世世切莫多情為殷勤傳言玉女囑與東君 前因放懷

却是且從今以後休要當真趁花前月下莫負芳辰直把長江作酒

教寫盡萬斛輕塵更吹徹玉簫聲裏字字冰清散花女史善齋請余

製簫譜因即填其所

之作授

青藜閣詞鳳皇臺上憶吹簫三和心齋云午日穿簾桃枝弄影天
風吹落瑤箋誤聰明兩字嘗盡辛酸憎殺鶯啼燕語牽惹起種種
愁端難消遣悲來看劍病去逃禪蕭閒焚香默坐較詞膽詩腸總
不如前啞江花早謝無力爭妍造物豈真忌汝也應是骨相單寒
且偷占一園春色幾片雲山

上西樓 牡丹

蓬萊謫下瑤英殿殘春恰似低垂玉佩舞金裙 風乍暖晴初展正

芳辰特地招尋知是惜花人

青藜閣詞上西樓牡丹和心齋云東西吹雨絲絲洗妝遲憐殺愁
紅一片弱難支金縷舉天香吐試晴時好博玉堂僊客贈新詞

百字令 偶書代柬寄碧岑

催春風雨霎時間都是飄香零玉無賴鶯啼人喚起好夢尋思難續

千日中山百回屈賦祇是銷魂獨總然無計向維摩證因宿 曾記

問恨閒愁吹簫三疊不盡那心曲七尺鑄來空翫髒一樣悲歌痛哭

應想從今多生結習還懺西方竺回頭拋却許多人世蕉鹿

青藜閣詞百字令代東奉酬心齋云香薰石葉劈雲箋題遍江南
風月檢點好言君道盡更何處求生活換微移宮翻新合古製譜
真奇絕清詞三疊試把玉簫吹出添取一院濃陰數聲啼歇瞬眼
春光易鏡日藥爐相伴住墨海微塵堆積結習無多詩魔酒障最
是難銷滅談禪說法慚愧舌間功德又如泉熊埤澹僊詞有鳳
皇臺上憶吹簫題吳中女史自度腔書任心齋先生簫譜後云淚
點成斑關情不少傳來字字生香任尊前拍手高唱何妨為報西
風可否將此意吹到吳江試看取夢回月榭人倚吟窗悠揚个中
無賴怕鳳管聲聲吹斷人腸把新詩疊奏盡總宮商響徹碧雲天
際問誰个正舞霓裳料應是驚鴻願影夜月如霜其二云曲譜吳
腔情傳紫竹知誰巧語鶯偷是佳人名士雅擅風流贏得青衫紅
粉都併作一片清謳應有个雲間弄玉跨鳳來遊悠悠騷場何處
恁萬種相思又上心頭縱參空色相難斷閒愁我亦天涯淪落消
魂處無限悲秋遙想到玉簫聲裏簾卷高樓璉字商珍號滄落亦
號茹雪山
人陳遵室

朱春生字韶伯號鐵門諸生有鐵簫庵集

貂裘換酒 題寒鑪買醉圖

如此秋光好看西湖亂山深處楓林紅了十里沿溪彎環路不借一

雙能到且莫管亂雅殘照記取年時沈醉處揭青帘便索銀瓶倒煨
落葉煖清醪 舊愁新恨知多少似今番清游有幾暗傷懷抱白喫
天台胡麻飯乞食何曾一飽悔不作酒家傭保一樣飄零風絮影看
當鱸人也朱顏老休怪我鬢霜早

程邦憲字穆甫號竹盦嘉慶壬戌進士官翰林院編修鴻臚寺少
卿有遲雲吟館稿

眼兒媚 賀陳松崖燕喜

簾涼枕膩未寒時開鏡曉妝遲徐舒纖指輕拈彩筆巧畫雙眉 霏
紅沓翠氤氳處瓊想譜新詞芙蓉帳暖櫻桃情眷喜溢星期

邱 岡字昆奇號筆峯附監生有德芬堂詩餘

水龍吟 楊花用東坡韻

莫春三月江南傷心人向樓中墜和烟和霧如絲如縷全無春思刺

繡房櫺秋千院落綠窗長閉訝如此春光雪花堆鬢何曾是因風起
一片隋隄舊事儘天教輕風吹轉游絲繫住無端又被兒童捉碎
此去銷魂生涯漂泊儻歸萍水被魚兒咬取也應認得是相思淚

點絳脣 春閨

窄裊羅衫酒痕只爲傷春浣小詞誰和閒把鸚哥課 裊娜東風蠻
柳腰支惰紗窗坐繡絨輕唾一點含桃破

行香子 湖隄記遇

陌上飛花山脚殘霞趁春風走送香車佯羞卻立團扇輕遮小歌喉
小裝束小年華 才按紅牙又抱琵琶料伊汗溼透銀紗三三五五
借問誰家忽同行忽小住忽天涯

愁春未醒 辛丑十二月雷雨大作時立春前十日

紙香賦菊蠟薄舒梅訝蜂喧蝶鬧春光消息向冬回暖住同雲六出

飛花竟不開南軒病起圍爐未擁敗絮空堆 一霎時間雨鑽簾隙
風撼牆隈聽天邊阿香車轉借作花催抱膝閒吟澆愁且倒甕城醅
嬌兒高喚霜橙要剝香芋須煨

夢揚州 陳宣謨自維揚歸譚平山堂之勝

柳花飄趁曉晴京口開橈乍反故鄉便說江頭金焦有無山色憑空
見怪隔江江水迢迢私心幸曾聽得廣陵鐘打殘宵 携著詩囊酒
瓢愛月下人過二十四橋畫閣繡簾試問誰來吹簫玉鈎斜畔樊川
夢惜昔年我也魂消輸伊處金箏偷撼銀燭高燒

滿江紅 題姚磬兒傳爲長洲詹湘亭作

春漲秦淮水閣外簾波漾碧好著个雲鬢螺髻柳腰梅額玉笛和殘
金縷曲采箋寫徧簪花格願郎君高奪錦標回金錢擲 向衆裏傾
身惜又獨自當心畫算逢場歌舞究非良策絮肯沾泥還較可蓮如

出火真難得縱一年結个短因緣儂知道

帆趁蘭橈願拋卻風姨月姊便萬一
郎情不測有如江水寶瑟輕携
桃葉渡鈿車穩載金閨市忽橫雲遮斷
白門秋心先死 言頻屬書
頻寄懨懨病牢牢記自明璫解後日
長門閉聚淚綃從前日到墜樓
珠向今宵碎慧心人若不帶癡根能如是

葬並真孃也算傍要離之墓傷心煞
青山一片美人黃土拚擲千金
收駿骨直輕千里來瓜步謝伊家踏浪
白衣冠初聞訃 空記得閒
言語空留得新詞句怕花枝欲活又
吹風雨那有真人收鈿盒依然
假母空錢樹看折除豔福到青衫天公妒

趙 筠字竹君號靜香江西候補按察司知事有餅隱庵集

清平樂

題南湖柳隱圖

柳棄疾云詞
見柳隱叢譚

金風亭長欸乃傳漁唱今日風流誰嗣響
料理露篷烟棹 似聞鴛

水詩盟依然雋侶清聲商略雙柑斗酒綠楊深處聽鶯

朱世傳字繼武

百字令

兀然枯坐正排雲雁過咽風蛩響對此茫茫生百感偏把少年追想
杯舉秦樓簫吹吳市人羨黃河唱龍門天半看來高只尋丈詎料
柳眼難青蘆頭易白老屋長教仰不死雄心時拭劍無用還同空掌
紫岫凝霞清潭映月宋玉懷聊放一聲長嘯撲來簾外秋爽

袁

宓字仲容號山史棠次子有餅桃花館詞

去病案仲容爲鐵門愛壻有才無命

鄉黨莫不惜之

浣溪紗

翦翦輕寒似暮秋絲絲細雨織春愁朝來生怕上簾鉤
又是去年時節近落花飛絮滿汀洲憑闌日斷小紅樓

清平樂

霜寒月苦秋夜長如許夢醒無聊更暗數殘點正敲第五
蕭蕭庭外風聲沈沈遠樹鐘鳴最是燈花如豆照人孤影偏明

唐多令 寒食紀游

宿雨潤輕紗新晴麗物華意行不覺夕陽斜澹沱春光隨處好且莫
問路三叉 高柳盡藏鴉清溪似若耶陰陰門巷是誰家門外竹籬
臨水短有一樹碧桃花

眼兒媚

丁丁銀箭夜初長對影獨淒涼寒砧萬戶秋風滿樹併入迴腸 去
年記得逢今夕人在鬱金堂花街露溼迴廊月上笑捉迷藏

高陽臺 荷誕日飲鄭氏園亭

地僻留雲堂虛疑雨清涼真住水壺水佩風裳狎鷗人在菰蘆傾杯

共上荷亭望藉苔茵軟勝氍毹恣酣呼賓主須忘禮法休拘 方池
不若摩訶好愛碧筒初折細走如珠身世評量孰間只合江湖商飈
已做新秋意算重來景更蕭疏興難孤三五良宵竹裏行廚

喝火令 泛舟龐山湖同子玉作

四面蘆芽短風聲更水聲扁舟搖曳有餘清恰又遠山對面分與一
痕青 端覺煙波好浮家過此生安排蟹斲與魚膾只要松陵一集
箸能成只要故人青眼時就白漚盟

邁陂塘

算韶光黃梅做了悵悵又近重午苔痕滿院經過少消盡廉纖細雨
誰與語只兩部鳴蛙鎮日常相絮閒尋廢圃悵杞鞠新栽石榴初放
一半委泥土 前游憶人竟隨春歸去沈郎腰瘦如許長隄幾樹垂
楊柳映帶盈盈南浦猶記取奈新漲三篙沒了江心渚此情難賦任

密字旁行千絲萬縷愁似春蠶吐一作繭

金縷曲 呈顧青菴先生

天者蒼蒼耳問何爲才人運蹇千秋一軌半世坎軻猶未足疾病顛
連如此况五十先生老矣絲竹東山陶寫慣奈中年更有傷心事搔
短髮情無已 門衰祚薄嗟何恃最難堪安仁傷逝西河喪子窮巷
寂寥誰慰藉賴有故人三四還載酒時來問字往往銜杯爭覓句隱
眉間尙露飛揚氣真不朽一編是

鳳凰臺上憶吹簫 題陳芸圃花間尋夢圖

花影霏微露華淒冷宵深景太清幽况神傷奉倩何地理憂曲徑長
廊尋處夢也無絲蒼涼甚舊時月色恰又南樓 添愁魂來彷彿悵
翩若驚鴻一瞬難留更花間行跡歷歷心頭百轉回腸如水并州剪
不斷長流須珍重安仁鬢毛一夕霜稠

金縷曲 錢塘蔣芝生爲余兄弟作小影名檢書圖裝池竟感
懷亡兄因譜是解

誰寫鮞生怨倚危闌分題檢韻肩隨予季百尺高梧秋陰薄涼潤琴
書棐几正百感茫茫對此當日田家三荆樹痛一株玉折蘭摧矣掩
卷坐淚如水 而今歷歷猶能記十年來寒窗燈火同溫姜被又是
對牀風雨夜顧影惟吾與爾更唧唧鳴蛩四起碧落黃泉無夢到讀
遺詩聊當深談耳燈欲燼愁方始

菩薩蠻

輕陰薄霧清明節河橋柳又穆穆碧燕子舊巢來去年人不歸 背
人情脈脈鞞袖慵無力鎮日倚闌干東風生晚寒

袁

宸

原名

字叔達一字叔獻號石卿棠三子候選吏目

菩薩蠻

題陳芸圃花間尋夢圖

去年花落春歸驟今年又到鶉啼候舊夢且重溫胡香能返魂
珊
珊剛見影又被花鈴警倚遍曲闌干月斜生曉寒

笠澤詞徵

百尺樓叢書

卷十二

邑後學

陳去病輯錄

清

郭 麐字祥伯號頻伽附監生有蘅夢詞浮眉樓詞懺餘綺語爨

餘詞

自序余少喜為側豔之詞以花閒為宗然未暇工也中年

託清微遂有會於南宋諸家之旨為之稍多其於此事不可謂

不涉其籓籬者已去病案先生為一代詞宗遺聞軼事莫不

耳熟能詳故茲從略焉惟聞其遷魏塘後子姓口落當洪楊時

值薪乏無以為炊其家竟取其靈芬館板析而焚之吁其恫

已同光間仁和許邁孫獨心折先生至自署靈芬私淑弟子并

刊其詞入榆園叢書於是先生之名益顯今則詩集亦有翻雕

者矣又記少居東江曾見先生手跡詩詞一卷蓋為其表叔陳
夢琴書者均係晚年未刊之作當即錄副藏之年來奔走南北
是稿忽爾失去屢向陳氏借鈔
迄未之許誠生平一憾事也

疎簾淡月 寒月

澄澄寒水漸浸入玉階冷清清地一個愁人獨自披衣夜起小窻瘦

影初斜矣怕難禁清寒如此梅花閣下蘆花簾外那人睡未 此際
遣懷無計况殘碣隣笛一時俱至獨立閒庭惹起幾番心事孤鴻弔
影霜天裏驀回頭月明千里今宵酒醒一聲霜角清愁而已

釵頭鳳 簷鐵

屏山曲春眠足丁冬驚起鴛鴦宿重簾靜重闌凭月明如水梨花無
影認認認 珍珠箔秋千索琤琤攪碎簷前玉呼人問春來信鸚哥
報道東風猶緊聽聽聽

好事近

深院斷無人拆徧秋千紅索一桁畫簾開處在曉涼池閣 潛行行
過曲闌干往事正思著猶認墮釵聲響卻梧桐葉落

憶少年 寄徐江庵

黃花開了兔花寒峭霜華滿地酒徒已星散况酒邊羅髻 燕去鴻

歸人病矣也無人會此時意蘆花徧煙水作雪花飛起

卜算子

簾外雨如煙柳外花如雪已是慙慙薄病天又作清明節
昔日結如心今日心如結心裏重重疊疊愁愁裏山重疊

清平樂

水文廣篔傍墮雙釵燕花映枕函紅兩鬢羞被小鬟看見
何人驚起蘅蕪起來手弄荷珠得伴片時香夢翻教人羨青奴

蝶戀花 垂絲海棠

山桃落盡酴醿早積雨初晴紅入紗窗曉睡起美人潮暈小笑渠一
樣鬢欹倒 病酒心情寒料峭醒眼看人醉眼看花好人不若苧花
定笑試然絳蠟花間照

鳳凰臺上憶吹簫 題姚棲霞女史剪愁吟同朱鐵門作

銀燭筵前鐵簫庵裏酒闌客正驚憂出一編相示絲格銀鈎真是閒

愁萬斛問恁地剪得卿愁分明是芳心灰盡紅淚還流 仙游一聲

鶴唳恐玉宇高寒露冷風秋悵不逢簫史空怨秦樓便是殘香賸粉

人間世不合長留宵深也吹寒角聲又滿城頭 棲霞游仙詩卻笑樓頭秦弄玉肯攜簫史

共乘鸞臨終詩冷夢未成
燈自滅疎鐘畫角一聲聲

蝶戀花 花宮小院得斷縑於壁月鬢風髮髻未損上書愛

月夜眠遲某月日清環寫字跡妍媚可念爰作詞以紀之

青豆房中花似露圖畫春風零落蝸涎蛙不是深閨留絹素調鉛肯

把芳名注 相逢亦有前緣否花不知名也合殷勤護鵲尾金鑪香

一炷夜深蘅夢樓深處

金縷曲 鴛鴦湖秋感

曉起西風冷挂輕帆孩兒橋下謝孃門徑落日鴛鴦湖上過衰柳條

條牽恨問何不當初折盡岸草汀蒲都不見但蘆花蕭瑟風淒緊橫
一葉釣魚艇 春人只把春愁省誰管他荒荒落照疎疎雁影去是
春初來秋九兩袖啼痕重印只湖水清流如鏡鏡裏妝樓金翠換況
樓中桂葉明蟬鬢除漚鷺沒人問

賣花聲

十二玉闌干六曲屏山留春不住送春還昨夜梨花今夜雨多分闌
珊 春夢太無端到好先殘袂衣初換又添綿只是別來珍重意不
爲春寒

高陽臺 過流虹橋感葉元禮事

兩岸緋桃一彎渌水斷橋猶說流虹舊事無端牽人舊恨重重多情
只合相思死更何須眉語曾通太恩恩春盡飛花淚盡啼紅 高樓
當日知何處想房櫳宛轉窻戶玲瓏天遠瑤姬彩雲去也無蹤人間

我亦傷心史似流鶯只哭春風小橋東新月天邊依舊如弓

祝英臺近 和龍劍庵韻

小屏山雙畫燭寂寞舊時事過盡春光尺素未曾寄試看樓外垂楊
飛花飛絮憔悴甚樹猶如此 輕相棄惟有六扇樓窗曾同那人倚
煙鎖重樓人更可知矣料應一點寒燈一鈎斜月今夜裏照伊無睡

蝶戀花 鹿城半園有女郎以簪畫壁作一絕云月底纖纖

扶婢來梨花如雪點蒼苔紅蠶辛苦愁絲盡誰把同功蠶擘
開後書一毗字意欲題名而未及者作詞其後亦無使其無

傳焉

青粉牆頭苔沒砌誰拔金釵畫破春痕細羅襪纖纖來月底有心人
識相思字 天遠彩雲飛去矣卿自何來有個芳名未料得欲題還
又止當時直恁懨懨地

喝火令 題許校書清露瑤臺圖

鶴背吹笙下橋頭步履通雲鬢霧鬢太玲瓏只恐五銖衣薄曉起不
禁風 好夢渾難覓重游未易逢鬱金堂北畫樓東記得樓頭一樹
碧梧桐記得碧梧桐外兩度月如弓

滿江紅 呈座客用湘湄風雨對牀圖韻

雪白鐙紅當酒半忽跳而起不痛飲有如此酒有如此水留客酒難
頻夜滿分湖水送離人幾算人生不合作同心同鄉里 浮蠹淥釭
花喜朋與舊兄和弟便沉沉春酌不能已已病起尙存兒女態醉來
稍有英雄氣得故人滿眼酒盈樽吾狂矣

月華清 詠丁香花

碎剪鮫綃輕含雞舌繁英枝綴如霰百結芳心慣向春風凌亂算江
南花信更番誰似此香生色淺幽怨共芭蕉卷處一齊斜颭 可惜

雨香雲澹少月影半窗照伊清婉丁字簾前有個丁孃淒斷想春衫
繡上重重怕寬了舊時腰襖簾卷又惺忪碎影小庭篩滿

十二時 同湘湄夜坐

疎窻四面秋霖一陣愁人兩個天涯已腸斷况離情無那 桐葉初
肥蕉葉大說淒涼也無人和今宵尙相對怕來宵燈火

齊天樂 荻莊秋荷

翠匳一境平如拭數枝點綴秋意衣褪輕紅佩翻重碧又是一番梳
洗涼蟾初起怕炤見盈盈玉壺清淚風急雲輕露華漸重瀉鉛水

鬧紅舊事誰省有斜陽一舸雲葉雙髻螢火光寒蜻蜒翼斷催老鴛
鴦身世煙波無際且凍釀頻傾曲闌峭倚寄語閒漚柰厭厭宿醉

賣花聲

秋水淡盈盈秋雨初晴月華洗出太分明照見舊時人立處曲曲圍

屏風露浩無聲衣薄涼生與誰人說此時情簾幙幾重窗幾扇說也零星

摸魚兒 盪湖船

一篷兒花天酒地消磨風月如許吳娃生長吳船上只共鴛鴦爲侶
船六柱從不識愁風愁水天涯路輕橈容與問兩寺東西半塘前後
商略泊何處江南好不在中流簫鼓牽人好夢無數十年水驛風
燈夜負了畫船聽雨臨別語怕紙醉金迷忘却秋娘渡重來記取有
澹澹窻紗疏疏簾影隱隱數聲鶯

水龍吟 吳歌

摩訶池上歌殘一聲何處悠揚起將連忽斷似無還有月明風細月
子彎彎花開緩緩一般情思算笛家不是漁家不是問莫是劉三妹
子夜四時堪擬變新聲我儂歡喜扁舟夜泊人家兩岸聽風聽水

白葛單衣蒲葵小扇新涼天氣又前溪柔艣嘔啞說是釣船歸矣

臺城路 同嚴丈懋亭游舒氏園作

薄陰不散霜飛早園林深貯秋意水木清蒼陂陀高下澹與暮雲無際紅泥亭子占一角孤城七分煙水最愛疎疎竹竿萬个滴寒翠

年來俊侶都散便登山臨水只恁顛顛倦柳攀條清流照鬢暗老悲

秋身世荒寒如此又畫角聲中夕陽垂地樹樹西風暮鴉寒不起譚獻

云雅令

翠樓吟 山行幽絕臨水數家門外木芙蓉正花爛漫無次殊

愜幽情紀以此詞

濕翠霑衣暗苔黏屐幽尋最愛清曉峯回剛路轉恰對面數峯清峭似儂曾到只三兩人家看來都好柴門小芙蓉無數一時紅了誰料隨意閒行有芳塘花鴨徐熙畫稿水邊同照影定見我風前側帽

也應含笑怕青鳥丁寧玉容易老尋芳早向人山色一眉新掃

柳色黃 西湖秋柳用穀人先生秋柳詞韻

西子湖頭歸路繫船暮色催霽疎疎漏出斜陽便做秋來詩意春人
老去想見油壁車歸銷磨君帶同心字有一陣西風添一分顛顛
還擬東風舊院北苑新圖南朝蕭寺幾點昏雅小坐蒼煙叢裏荷花
桂子分將一鏡新愁照他鬢影清無底縱有浣紗人挽纖腰不起

摸魚兒 茨菇

買陂塘兩邊添種高荷大芋相似生成葉葉雙岐樣合傍溪流燕尾
江上水記送別西灣話到年時事故人歸未正軟柄欹風低枝鬧雨
一碧亂無次 江鄉好隨意純絲菰米食單多在水際雞頭菱角堆
盤後草草田園風味渾不記合付與廚娘略下些鹽豉旗亭小市共
山栗燔餘村醪熟後閒買夜來醉

水龍吟 蘋花

菱歌唱斷前溪青山影裏秋江老晚風乍起涼煙不散數花開早去
鳥明邊開鷗眠處采香人少便翠禽一點愁他難立除非是蜻蜓小
有客溪頭垂釣又勾留一年過了楊花身世蘆花伴侶嫩寒清曉
隨意停舟偶然照眼添枝紅蓼向水仙祠下登蘋攀藻共寒泉茗

疏影 花影吹笙圖

空庭潑水正玲瓏澹月簾影垂地悵望銀河閒弄參差箇儂知是誰
思橫枝清瘦疏花活漸篩滿薄羅衫子只枝頭翠羽雙栖闌見那時
情事 難忘黃昏院落畫闌十二曲曲曲同倚半攏春纖半度脂香
灸暖一行銀字年來白石風情減有自作新詞誰記但每逢花月嬋
娟便想畫中雙髻

國香慢 媚蘭小影爲夢華題

眞色生香有小名試錄

王詞綜作錄就

雅稱孤芳幽居自憐空谷未嫁王昌

定記宮牆留字聽鐘聲催月斜廊

用明宮女媚蘭仙子詩

無言但凝睇一寸愁

心多少思量

彩雲天遠想明眸秀鬢霧閣雲窻玉梅花下誰念蕉

悴何郎尙有三生舊約怕錦瑟今似人長還應只如此楚楚眉痕澹
澹明妝

南樓令

題春人縮髻圖

春夢暈潮霞春風褪臂紗緩春愁盤好雙雅溜了金釵佯不省問開
否碧桃花 鏡檻者般斜新妝略似他只脩眉人在天涯尙著薄羅
衫一件簾又卷太寒些

望湘人

用穀人先生韻

漸蕭蕭瑟瑟冷冷清清客懷如許淒戀衰柳翻鴉枯荷鬧雨子夜怨
歌先變鏡裏霜寒燈前人瘦眉邊山遠儘哀絃一曲思歸飛起十三

箏雁 數盡更更點點把孤衾斷夢一宵尋徧只文鴛繡枕記得舊
時曾薦酒痕濃澹淚痕重疊溼了小蠻鍼綫問何日纖手親攜笑勸
芳尊須滿 譚獻云清
深婉麗

江城梅花引

一重方空一重紗采蓮花采菱花愛住吳船生小號吳娃牆內紅樓
樓外水有明月照鴛鴦宿那家 那家那家在天涯雨又斜雲又遮
聽也聽也聽不到一曲琵琶漸漸西風秋柳不藏雅欲倩西風吹夢
去還只恐夢魂中太遠些

酷相思 苦雨

屋角鶉鴝催不去和簾外流鶯語問裏湖外湖曾到否朝來也瀟瀟
雨晚來也瀟瀟雨 溼了清明寒食路把杏花期誤只孤負討春人
此度春去也留難住人去也留難住

水龍吟 湖心亭夜泛追憶舊游俯仰身世渺渺兮余懷也

月痕都化涼煙雙堤沈在涼煙裏蕩華露溼菰根風戰瓜皮船艤一寸秋心三分是月七分是水看湖心點點山山不斷渾只露依微髻忽憶去年此日伴故人斂舷同醉笑橫長笛倚歌小海有魚龍氣游倦成悲離多易老居然千里但回船夜半圓沙拍拍喚眠鷗起

邁陂塘 自題山陰歸櫂圖

問年年阻風中酒江湖人竟歸未居然一櫂衝風雪妝點蕭蕭行李圖畫裏有萬壑千巖送箇人雙髻剡谿休擬且霜破黃柑鐙挑紅粟晚飯柁樓底 移家好莫認鷗夷西子鏡湖他日須賜千絲細網三生石兩槩劃開春水歸去矣算泛宅浮家儘可稱鄉里櫂歌聲起試擁檝煩卿扣舷和汝此曲定能記

洞仙歌 寄素君

綺窗臨水挂一重簾子簾外垂楊畫船繫道春風正好催放輕橈全
不管先把箇儂催起 嘔啞聲未遠轉箇灣頭眼底便居然千里不
見一重簾簾外垂楊又何况隔簾雙鬢算臨風別無言忒忽忽有曲
曲溪流是伊清淚

水龍吟 語兒道中萬綠如水澹日微陰時漏疎雨扁舟搖兀
其間爲賦此調

是晴還是微陰濛濛好箇江南路桑陰兩岸竹梯橫閣最深深處去
鳥孤明連山積翠夕陽界住正扁舟有客微吟淺醉譜腸斷方回句
又是一年羈旅一年春又隨人去換他幾點漚邊鷺外疏疏殘雨
圓鏡冰寒生綃紅潤也應淒楚待歸時細問香銷夢斷定思量否

紅情 題二娛鷗夢圓圖用玉田韵

生香活色有水天閒話憑肩語密除却鴛鴦只有眠鷗似相識三十

六陂舊夢明鏡裏低徊潛憶問微步一餉凌波羅襪可曾溼小立
髻鬢側想明月那時流水今日春風靈液澹盪其間浪痕碧自恨采
香太晚重到也紅衣非昔又況畫船艤處船中玉笛

齊天樂 北山旅館圖用穀人先生韻爲華秋槎司馬作

十年載酒江湖徧不歸如此湖水小艇鳴榔低擔結網穩住一家深
翠畫圖寫意問選箇江鄉西湖有幾鴨脚黃邊幾人同此夕陽醉
當歸故鄉應寄笑薛宣東閣真欲相吏笛裏伊涼胸中雲夢暗老英
雄身世壯心不已道種菜閉門漸諳斯味何況鱸蕪秋風斜日裏

高陽臺

隨園席上贈別疏香

篋中詞題作將返魏塘疏香女
子亦以次日歸吳下置酒話別

離懷
惘惘

暗水通潮癡雲

嵐作集

閣雨微陰不散重城留得枯荷奈他先作離聲

清歌欲遏行雲住露春纖並坐調笙莫多情第一難忘席上輕盈集作

輕輕 天涯我是飄零慣任飛花無定相送人行見說蘭舟明朝也泊

長亭門前記取垂楊樹只藏他三兩秋鶯一程程愁水愁風不要人

聽 譚獻云中
邊俱徹

買陂塘 信宿隨園頗極文燕之樂將歸之夕蘭村以秋夢樓

圖索題黯然賦此

小紅樓居然百尺文窗了鳥深閉豈知中有悲秋客夢與碧雲無際
湖海氣只打疊柔情不斷如春水偷聲減字問白石玉田金荃蘭畹
多少可憐子 浮名好低唱淺斟何似爲誰此景輕棄六朝山色雙
眉嫵換了青衫從事我醉矣想葛帔西華那有桃花米能謀酒未怕

江上荻聲堦前蛩語漸漸有秋意

時蘭村將
入都謁選

祝英臺近 題梅卿女史倚竹圖

玉釵長金釧瘦濃綠翦雙袖刻偏琅玕又是一詩就問他翠羽三更

擇龍半夜可窺見繡鞋冰透 算佳偶鳳翥天外尋難得似舊人否
磨鏡劉楨平視也低首同君一樣西家牽蘿補屋定念我暮寒時候
貂裘換酒 十月一日偕鐵門倪米樓同遊冷泉亭至白衲盦
下山經蕭九孃酒壚泥飲而歸屬湘湄作寒壚買醉卷子紀
以此詞湘湄曾與余雪夜同宿酒樓持火入山題詩石壁上
此圖亦不可無詞也

雅鼻紅如此正千山萬山夕照不知幾里忽見青旗高樓外其上有
翩翩字有隨分橙黃笏紫我是酒徒元無賴索銀餅莫笑龐豪氣鷗
霜解可容貫 四山積雪危闌倚話當時風懷酒膽故人老矣不向
冷泉亭下醉負此松風兩耳況落葉紛紛而至寫作畫圖傳也得要
壚頭貌个雙丫髻渠能記十年事

金縷曲 題米樓夢隱詞卽用其集中紅豆詞韵

燭池更闌矣怪今宵聲聲落葉都來窗裏細字蠶眠無多幅不信愁
人至此看眼底詞流有幾偶作天風海濤曲又吹花嚼出紅霞藥翻
然跨琴高鯉 天涯別緒紛難理漫沈吟舊歡如夢流年如水說著
江南斷腸句中有淚痕隱起只合付薛家車子張緒漂零尤袤遠謂
卿二 娛 儘時人笑把周秦比莫寒了調箏指

夢芙蓉 蘭村寓大佛寺僧樓同人畢業湘湄爲作湖上雲萍

圖紀以此詞

北風江上冷正湖天黯黹客懷淒緊凍雲幾葉流出片颿影故人期
尙準楓林休負霜信佛屋蕭然有兩三倦侶吟到夜鐙暈 同調相
逢一晒中酒悲秋已是三生病畫中眉嫵不似舊時靚雁飛渾未定
夕陽猶戀寒陣如此江山又怱怱別去十日醉應肯

疎影 湘湄有所恨畫青梅子一枝以寄意霜辛露酸別有寄

託非牧之詩意也以余有元白之好知拂面花故事屬倚聲
以紀

玉梅未落有枝頭點點酸意先著齒冷吳孃不管春寒臨風自弄霜
角高樓也有人橫笛但樓外翠禽偷覺試問伊葉底清圓莫認綠陰
成幄 記否年年此際鸚桃已結千蠶豆初熟山店燒春寒食時光
陌上草痕新綠消他幾度沈沈雨已過了杏花餈粥又教人腸斷江
南只恐方回難讀

金縷曲 山民出示國初諸公寄吳漢槎塞外尺牘輒題其後

幾幅叢殘紙是當年冰天雪窖眼穿而至萬里風沙寧古塔那有塞

鴻接翅更緘寄烏絲彈指二集一代奇才千秋恨換故人和墨三升

淚生還遂偶然耳 諸公袞袞京華裏只斯人投荒絕徼非生非死

徐邈顧榮皆舊識立齋難得相門才子容若歎不僅憐才而已感慨何

須生同世看人間尙寶瑤華字只此道幾曾棄

邁陂塘 二月十四日坐江山船行諸暨道中山水清妍雜花

生樹傷春傷別情見乎詞

放輕船青山影裏欹斜帆葉低挂溶溶漾漾平堤水誰把越羅新研
花事乍已過了花朝春月圓今夜砑樓飯罷有新柳泥人閒鷗窺客
愁重酒難把 當年事想見鷗夷妍雅扁舟容與其下一峯最遠眉
痕澹絕似苧蘿初嫁誰共話算如此江山少箇人如畫先生歸也問
春雨樓頭杏花賣未和淚寄羅帕

水龍吟 題陶鳧鄉客舫填詞圖

欹斜幾扇烏篷消磨詞客江湖老阿誰畫出微茫煙樹翩翩沙鳥苔
響往來當時相見中仙風調儘船頭獨酌船舷獨斂除漚鷺無人曉
欲放扁舟何處路彎環牽去絲風裊東禪寺畔相思樹底小紅猶

小我若相逢阻風中酒年年都好笑
怱怱回首煙波已過却松陵道

臺城路 題徐縵雲今宵酒醒圖

阿誰抵死催人去樓頭五更鐘動玉筋痕垂銀荷灰燼消得幾番潛
送如塵似夢有萬疊山低一篷愁重月曉風殘離情別恨此時種
江郎賦情漸減送君南浦路若箇曾共白雁橫天秋河絡角江上夜
潮初涌薄衾孤擁想隔著高城水精簾控吟到銷魂瘦眉山字聳

聲聲慢 西湖寒夜懷淥卿山左

酒波暖處鐙暈寒初客愁最苦消凝鏡裏年光誰念暮景飛騰西湖
月荒沙白剩南山尙見高稜定笑我向危樓獨上曲檻孤憑 忽憶
故人千里欲舉杯相屬喚恐難磨雁字回時須寄一幅吳綾齊州暮
煙九點怕柔魂飛夢無憑待見也問今宵成夢未曾

臺城路 題米樓高山流水圖

世間無事無三昧惟愁會心人少半死桐枯七條絲細未識此中何
好有人絕倒正水遠山長獨移孤棹寂寞千秋也應直得絕弦了
知君一襟幽抱問悵悵琴趣幾箇同調夢裏庵荒蘆中士賤容易國
工先老君有蘆中秋瑟詞波平風小聽門外挈音是儂尋到若訪成
連刺船歸及早

疎影 黃葉邨圖

已秋未老正西風幾樹畫出斜照如此江南著箇扁舟看來煙水都
好漲痕初落籬根露添屋角數峯清峭想前邨定有人尋樹下小門
開了 自笑吾家同在半邨半郭裏歸計難料輸與谿翁三脚鐺邊
滿地霜華新埽馬塍西去秋盒冷只近日竹林游少謂小松怕蕭蕭
槭 淒淒點點暮鴉寒早

綠意 娜嬛仙館蕉花畫卷

新涼雨足正乍回曉夢天影都綠半拓吟窗忽見低垂重重芳意如
蹙煑茶煙澹秋痕瘦禪牆角一枝寒玉笑美人別逞妖妍小露紅情
猶俗 想爲著書人倦墨花斐几淨相伴幽獨史藁焚餘點筆圖成
仙掌露珠凝粟詩人愛寫蕭寒景恨未入雪中橫幅更待他鳳實成
時留配故園修竹

賣花聲 飲泉自畫芳草以寄望廬之思爲賦此調

一片好莓苔綠了空階葳蕤深鎖舊池臺除却斜陽和燕子還有誰
來 風約畫簾開獨自徘徊春痕如夢滿天涯泥上鞦韆泉下玉都
被伊埋

疏影 上元夜退庵招飲梅花下越日壽生自分湖來復會于
此用白石韻記之

玲瓏碎玉是舊時月色招我同宿隔歲相思第一回員休教便弄橫

竹微雲澹澹疎鐙小只解照枝南枝北儘夜深閒與徘徊不管倚樓
人獨佳約逾期肯踐夜潮放一舸來趁酒淥側帽吟寒也勝豪家
爛醉雲屏金屋江城試譜偷聲句怕略犯龜茲新曲算不如留影文
窗看取畫羅十平幅

水調歌頭 望湖樓

其上天如水其下水如天天容水色淨樓閣鏡中懸面面玲瓏窗
戶更著疏疏簾子湖影澹于煙白雨忽吹散涼到白鷗邊 酌寒泉
薦秋菊問坡仙問君何事一去七百有餘年又問瓊樓玉宇能否羽
衣吹簫乘醉賦長篇一笑我狂矣且放總宜船

清平樂

酒醒人起竹影篩窗紙薄薄羅衾涼似水第一天涯滋味 柔魂不
隔巖城曉妝見也分明欲續枕函殘夢奈他一陣鴉聲

疎影 夢

今生已矣又見來脈脈鐙背屏底道是相逢卻又無言悵悵自搵清
淚茫茫味味恩與極尙病裏狀狀情味算向時怨緒歡情歷歷只還
如此 只是吳根越角一千二百里芳草無際澹月微茫萬瓦參差
那認荒荒園子真教不隔人天路也勝似一生顛顛說與伊休返蓬
山洞戶悄然雙閉

高陽臺 題樂元淑煙夢詞

荷露圓珠蘭風回雪空留名字堪憐才刻茗華不知玉已如煙方塘
無數田田葉問青泥何苦生蓮擘吟牋有客西江愁滿歸船 年來
同抱司勳感算傷春刻意不似今年芳草西陵爲誰澆酒花前人間
只有三分月恨二分多照重泉又淒然一个流鶯相伴嘯鶻

卜算子

微雨濕苔痕階下秋花滿有箇階前顛顛人病起和伊看 又是一番秋只是無腸斷留得當年顛顛人也不恨天涯遠

臺城路 爲江子屏題蟬柳書扇

世間何限秋風客哀吟爾偏淒緊灞岸魂銷齊宮夢斷點入輕羅小景纖纖瘦影照病葉殘枝抱來難定寂寞誰人平蕪千里故園冷乖鸞秦女底處網蟲從徧了空認雙鬢蛻後仙衣妝餘寶鈿一例漂零誰省嗚雅露井只落葉聲中獨欹孤枕欲訴琴心暗塵埋廢軫

浪淘沙

歸燕已差參何處疎罨天涯蕉萃旅人心開到芙蓉無限好只是秋深 推枕起沈吟小簟輕衾楓根可奈薄寒侵又是一宵檐外雨到曉沈沈

金縷曲 席上贈阿許

燭暈華筵半怪琵琶抱來不正聲聲淒怨座上飛瓊傳姓字曾識舊
家仙眷量十斛珍珠偷換過眼瓊華昏似夢賸流鶯老去曉秋苑垂
玉筋淚痕滿 天涯有客停杯歎算人間古來多少桃笙團扇失路
才人孤憤客一例青衫淪賤只哀樂中年難遣試琢新詞能譜否怕
一聲裂帛鷓鴣弦斷將進酒莫辭勸

桂枝香 中秋有感

姮娥不嫁問終古淒涼可記長夜未必青天碧海便無情者一年十
二回圓闕恁今宵淚痕盈把那堪還又歌闌人散夢殘鐙炮 想妝
閣夜香燒罷看珠斗闕干檐角低挂有日雲鬢霧鬢照伊清話人間
小別何須恨恨沈沈青楓根下步虛聲斷霓裳曲破此生休也

疏影 燭淚

珠噉玉泣向畫筵深夜相對愁絕今世紅紅宿世蟲蟲生平最惜離

別風簾露席隨升降判滴滿爛銀荷葉算芳心去是灰時肯怕界殘
紅頰 便與籠紗護取也應護不到將炮時節苦憶高樓網戶噉隴
照見粉痕明滅羅襦低解聞鄉澤有誰問堦前堆積只淒然擁髻人
人愁浣石榴裙褶

譚獻云深思密藻漸近張周

小樓連苑 簾波用蘭邨韻

後堂前閣空明最深深處溶溶地龜紋半蹙駝鈎不上一絲風細月
地雲搖苔階潮轉欲垂還起怪驕獨睡醒雛鬢行到都驚道花枝碎
隔著樓頭廊底幾曾隔粉香脂膩只是陳王通辭難託湘雲湘水
便有時開見伊窵地畫裙斜曳總生憐俊眼將流流不出相思字

買陂塘 十二月五日三衢道中

怪吳船看來葉小載人愁重如許阻風聽水年年慣不似者番淒楚
臨別語約消夏筵開定不過闌暑歸期屢誤又二九時光一千里客

未半到家路 閒情賦更惹新來怨緒故鄉鶯燕相遇遠山不作忽
忽別肯作鏡中眉嫵語更苦怕病蕊嬌花難待春風主亂帆無數誰
信有中間烏篷一扇兩地夢來去

夜合花 鐙花寄湘霞

善恨蟲孃含情蠻女多生半是啼痕相思一寸灰心又長情根玉釵
冷玉荷溫囑雛髮掩上重門只愁無睡對伊絮語銷盡癡魂 江湖
孤冷誰親多謝一尊酒淥相伴溫存殷勤低視並頭開出蘭蓀有何
事報伊聞道歸人已近家村不知今後照他擁髻幾箇黃昏

疏影 惺泉浮香樓圖余舊爲作序并詩今相見吳門正梅花
時欲歸未得復爲倚聲作此不知有慨於中也

生香活色記舊曾相約短檣游歷認是西谿千樹梅花無人管領煙
月故家臺榭知何處有野鶴暫歸能說見當時二老風流閒倚畫闌

清絕 同向江湖流浪欲歸那便肯如此蹤跡江北江南銅井銅院

過了試花時節人生但有三間屋便無地種梅也得問何時深閉柴

門穩臥故山風雪

譚獻云亦本色語運思
竊曲便不覺其易盡

瑣窻寒 寓齋窻閒見金絲花架一股知爲閨中物先是此閒

彩雲曾駐凝想芳澤雜以遐思邀楊浣齋同作

花落辭枝珠空臉匣是誰留取粉褪香銷轉更殢人淒楚想當時曉
涼妝罷小鬟纖手穿無數有紅絨替約素馨分配鏡臺斜覷 人去

彩雲駐向花戶油窗拾來愁緒金絲幾縷也還勝同心釵股得知他
又側著髻兒明珠翠羽游何處鎮無慘細撚閒吟背燈深夜語

月華清 靈芬館前晚桂一株已蕊未華夕露晨飈傾佇良久

念將遠涉恐不能待詞以催之

簾卷涼天葉采明日月地當時試花曾賦偃蹇淹留略與小山爲主數年

來幾度中秋已半付天涯
露旅客與待寒金粟綴嫩黃蜂注
爲底銀屏深悄費似水尖風似珠涼
露寂寞姮娥愁損葉兒眉
嫵想夜來碧海青天定見我舊叢
延佇知否便能簪鬢髮鏡霜如許

買陂塘

富陽道中見烏桕新霜青紅相閒
山水曠發帆檣洄

沿斷岸野屋皆入圖繪
竟日賞玩不足詞以寫之

繞清江一重一掩高低總入明鏡
青要小試嬋娟手點得疏林妝靚
紅不定襯初日明霞斜日餘霞
曠風帆煙艇儘闕拓窗櫺斜欵巾帽
相對醉顏冷 桐江道兩度沿緣
能認者回剛及霜訊蕭閒鷗侶風
標鷺笑我鬢絲飄影風一陣怕落
葉漫空埋却尋幽徑歸來重省有
萬木號風千山積雪物候更淒緊

憶舊游

嚴瀨道中偕壽生同坐船頭倚聲
歌此幾欲令四山

皆響也

正風開帆葉雲擁山根又泝奔瀧合沓羣峯出似千屯冀馬高步臨
江江水彎環碧玉流影去淙淙算如此江山舊曾相識者箇吳艤
船窗喜同眺出崎士東京遺老南邦突兀高臺外賸紅衣一樹楓臥
空腔晞髮披裘都往斜日下漁江但極目寒烟滄波白鳥飛一雙

憶秦娥 秋海棠

秋如水露涼風細添顛顛添顛顛何曾得似那時濃睡 一番薄病
扶初起爲伊立向空階裏空階裏亂蛩殘月冷清清地

臺城路 和蔚堂題楊白花詩意卷子韻

不勝淒黯江南夢濛濛慣隨春去水驛波寒山亭風緊身世有誰爲
主迷離如許記曾向長隄那邊呼渡一帶絲楊前君不是舊時路
紗窗才拓幾扇只捲簾人起初見飛度燕子關心伯勞偷眼尙有流
鶯相訴東風辛苦問吹皺池塘送伊何所打槩蘋洲和儂漁筵譜

齊天樂 眞州見杏花盛開

江南何處無烟雨先生者回歸未淮浦
颿收楊州夢破墮入紅雲隊裏
烏篷搖曳早樸樹灣頭一旗酒貫
卅里天桃愁春未醒尙濃睡
江湖載酒無端笑梅花開過
猶自留滯今日重三明朝百五
又見老烏銜紙樹猶如此銷燕
燕鶯鶯幾番身世賣到樓前
曉妝人定起

瑤華慢 小金山梅花欲殘香雪猶浮動山水間

烟痕乍禁禊事初脩尙薄寒時節
雙槳掠波已喜得橋外水光先活
香南雪北賸一片冷雲明滅想妙
高臺最高寒未有玉人橫笛獨
欹烏帽來尋認月觀風亭步步幽
絕清遊較晚早滿磴落英如積斜
陽澹處又鈎起二分新月任隔牆
梵放催歸未許翠禽啼歇

夢橫塘 糧艘浣衣女郎婉頰可念感而賦之

文魚銜尾綵鷁排頭移來一痕波
軟小小窗櫺正雨過筠簾齊捲越

紵裁前吳棉坼後停鍼人倦趁洗頭盆好蘸碧按藍猶憐取餘香染
知伊住近橫塘有機中素織石上紗澣髻緝拋家便一任絮萍漂
轉算直北風埃撲鬢只恐羅衣暗中換弄暝天光舵樓晚飯想心情
都嬾

高陽臺 病酒

似夢還醒將眠又起今朝直恁無聊未展屏山 紋時動冰綃數聲
啼鳥驚人覺已懨懨紅日花梢喚茶甌眼倦微搓舌強須澆 天涯
沒箇閒消遣况故人重見俊侶都招雪白花紅那禁物色相撩元龍
豪氣隨年減算而今祇讀離騷計行程私祝江風莫阻歸橈

菩薩蠻 題雙紅豆圖

東風在手靈苗活南園紅豆春來發接葉更交枝一雙兩小時 長
真高閣好閣裏人難老記曲喚紅紅芳名也愛重

邁陂塘 題改七香少年聽雨圖

最銷魂蕭蕭暮雨吳娘舊曲曾聽畫船權轉花兜外六扇窗紗紅近
眠未肯任翠地香羅垂下流蘇等九枝燈檠照人影幢幢屏風曲曲
容易卸妝竟 歡場好只倚少年豪橫花前醉倒休醒星星一點來
頭上便與歌樓無分君也省要招此無家同住清涼境香鐙清磬儘
蝙蝠拂簾芭蕉繞屋欹枕睡來穩

時有破山寺
結夏之約

滿庭芳 題呂卿香齋館圖

蘿帶飄煙荔裳寒雨高館儘好吟秋楚詞課罷容易畔牢愁是處疏
簾不捲盪瀟湘一片雲浮閒行徧芷畦蕙圃隨意小勾留 前修思
屈宋美人香草寄託深幽便微詞多有也足風流好在桐花萬里肯
同他顛顛江頭只憐我王孫游倦歸思滿芳洲

水龍吟 題曼生石門聽瀑圖

青天何處龍吟濛濛吹出漫空雪松濤萬壑冰絲千縷琴心三疊洞
口雲荒山中鶴老何來此客想謝公去後石門深鎖留好景與誰說
海上歸來時節儘雍容閒尋風月簫笳聲斷箏琶耳洗一時清絕
木葉羣飛四山皆響蒼然寒色認跳珠濺玉銀河垂處有仙人謫

聲聲慢 和慈仲坐雨之作

蓬蓬尙遠淅淅將闌懵騰不辨朝昏汝南雞好虧他猶 蕭晨硯池
一泓殘墨爲昨宵留住愁痕還題句要裁雲剪月逗一分春 差喜
歸來相對正鐙花粲粲杯竹傳根才卸征衫又煩洗却征塵微吟淺
醉休輕視勝他時遠道懷人判醉也便取次書徧練裙

買陂塘 稼庭以藕香來歸繪圖紀事余題種藕成蓮四字於

首頁并系以詞

買陂塘玻璃十頃請看綠淨難唾東西南北皆蓮葉除是江南才可

開一朵認妙法華鬘不受青泥浣移根帖妥儘曲檻低凭畫欄閒倚
月曉未愁墮 臺城路聞說莫愁曾過沈吟佳約能果鷺猜鷗妒更
番事直得銷魂真箇浮一舸也勝似秦淮漆板紅船播修眉休鎖笑
栲栳波迴鴛鴦夢穩雙調唱還和

賣花聲 題李子木烟泉蘿壁看子

青玉削嵯峨秋影羅羅坐來寒翠濕衣多領取風泉歸一壑彈入雲
和 卜築傍岩阿老子婆娑郎君撰杖待行窩肯信有人空谷裏日
暮牽蘿

如此江山 西齋七十二賢峯草堂圖用琴隲韻

十年蹋徧西湖路西溪獨遲搜討晚港尋烟秋華殢雪可許蘆中人
到山阿窈窕似羅列成行曲眉齊掃者箇茆堂分明指點出林表
余懷天際渺渺風塵都倦矣陳跡還蹈兩鬢先絲一椽未卜慚媿白

鷗吾導眼中了了只東野詩工有山難抱遂譜蘋洲聽歌應絕倒

笠澤詞徵

百尺樓叢書

卷十三

邑後學 陳去病輯錄

清

趙 函字良甫號菊髯自號香嚴居士震澤諸生有飛鴻閣琴意

二卷

黃燮清曰良甫與曹良甫同以詞鳴江南一時有平良仄良之稱去病案良甫浪游南北得名頗早六合汪紫珊

刊七家詞即集良甫紫珊與袁湘淵邨劉芙初楊伯夔顧兼塘作也六家皆已成獨良甫以未深研律呂堅執不許而罷迨三十年始自定其稿得九十閱刊為二卷蓋亦雅自矜重者已

長亭怨慢 秋柳

又微雨漢南吹暝踈地蕭蕭不堪攀贈繫馬遊蹤等閒金埒向誰問
舊時門逕梳一桁西風緊照水有長條替畫出蕭娘秋影 重認恁
絲絲織就三十六灣離恨那人何在儘消受月荒煙冷便如今再到
章臺惜零露凋伊青鬢只滿耳寒蟬猶說當年姿韻

洞仙歌

芙蓉一舸載可人江上隱向煙波打雙槳但携將家具賃取樓居閒
檢校卻月橫雲眉樣清宵看擁髻鈿尺親量製就紅羅合歡帳隔
院炙銀笙一片宮商有多少玉清惆悵趁燈火橫塘未闌時要問訊
梅花尋春來往

曲遊春

閨花朝同孫平叔秦秋南賦

春事平分後遞靈辰兩度春色猶淺萬點芳情在枝頭搖曳被風吹
散羯鼓催須緩休輕惹綠愁紅怨更繫春費盡宮絨重試瑣窗金翦
畹晚好春過半要惜取春歸先把春展蝶陣飛來向花陰再覓舊
時紈扇莫使流光換又風雨一番悽斷遲了水上瀾裙春遊欲倦
每遇
百花生日日未曾悽
斷似今朝韓偓句

聲聲慢

夜櫂胥江有懷苕卿

艣枝夏水霜氣激空孤遊飛逐寒月路入楓橋萬點昏雅接翼鐘聲
飄來百八帶離愁荒波嗚咽但耿耿抱清影坐對一鐙搖兀 簾底
昨宵惜別新來病零落也同黃葉悔不携將同上木蘭雙楫占取石
湖佳處理煙鬟天鏡空闊待後會把此情窻下絮說

江城梅花引 怡珊姊屬題小樓聽雨畫卷

深簾惻惻弄春寒醉無端醒無端怪煞江南情味不曾諳屋角鶉鳩
啼乍歇有輕燕啄香泥上畫闌 畫闌畫闌環復環惜花殘問花殘
問也問也問若箇紅淚偷彈化作燕支勻染薛濤牋寫出送春詞一
幅又送別綠波亭楊柳灣

解連環 芙蓉湖上水嬉書所見

畫橋春暝送絲絲雨點綠波千頃正水嬉鷓躍魚飛訝綽約雙桂
橈移近杏子單衫旋換了夾羅玉瑩恁閒遊閒玩拾翠芳蹤被人偷

認當年下簾鬪茗有天然秀靨一般嬌俊便算是桃葉重逢也難
問清歌石城離恨隔舫燈明許半晌水窗同凭奈人間不駐飛瓊鏡
花弄影

玉漏遲 綠肥書屋有贈

碧天風浩渺芙蓉出水佩環聲緩道罷勝常猶記隔年曾見一笑輕
拈羅帶是梳子同心親綰憐弱腕漫磨濃墨乞書團扇 又携手上
扁舟泛幾折清谿四更秋點柳意深深欲別復來縈絆露冷沾伊雙
鬢儘末麗花開如霰鸞鏡畔依然楚雲飛散

高陽臺 題汪湘屏西湖尋夢圖曩歲湘屏曾挈其婦汎舟西

湖得句云此生願向西湖死化作鴛鴦一處飛無何遂抱騎
省之戚湘屏之繪是圖蓋傷逝之情溢於楮墨矣

柳蛻春 波消曉靨斷腸人去西冷前度孤山又添三尺花銘鴛鴦

有恨知難化鎮徘徊斜日幽汀悵人間玉怨珠啼吹雨蓉城 雙隄
畫槳同携手記浮香水暖拾翠沙明鶯燕閒愁無端飛上瑤京鮑家
詩句纏絲唱惹秋墳碧草叢生賸荒烟亂撲青衫暝對南屏

齊天樂 瑤想閣贈寶霞

臨流自捲眞珠箔禪娟乍窺秋鏡秀靨消紅輕螺掃黛瘦了一分春
影晨妝甫竟被催上歌筵錄腰絃緊蒸地愁來畫樓歸去雨絲冷
青溪留得金粉蓼花疎斷處曲欄同凭誤却星期邀來月夕還是沈
吟不定休嫌薄倖倘一舸携將玉簫應肯露下秦淮夜涼香又燼

殢人嬌

月皎深簾燈昏別院容易教一番相見桃豔翠薄梨渦紅淺渾不是
當時靚妝華豔 瑞腦將殘羅襦未換閒拋却蕤紋珍簟傷春心事
經秋望眼要數到銅壺夢中聲斷

婆羅門引

瑤清小別木蘭權發太怱怱背燈無限惺忪不許驪駒早唱重入小
房櫳又垂簾泥飲坐到霜濃 山重水重復飄夢桂堂東欲認舊時
羅帕淚點銷紅花陰微步待親折階下木芙蓉拚憔悴倚徧西風

高陽臺 玉華樓對雨與蕪塘各賦一解

與鶴爲隣招雲共宿閒蹤容易勾留手摘蘋絲單衣弄影中洲西冷
柳色無人憶有疎蟬吟過殘秋繞雙隄權入荒寒不似前遊 湖干
雨洗青鬢露任鴻飛天遠客去亭幽賸碧殘金那堪重問沙鷗一杯
冷澹餘杭酒認衫痕都化清愁悵宵深隔水鐘飄夢覺斜樓

壺中天慢 淳安縣環山爲城余所居小方壺爲最高處夜聞

新安江聲不能成寐攬衣翦燭賦此

人愁春去又爭知春亦催人如水客裏駸駸空好序寒食清明上巳

雉浦流雲魚峯閣雨冷落同秋寺飛花一陣送他多少紅紫
遐想
碧玉樓頭緘情訴恨定有雙魚寄莫是潮來無準候阻住江船沙尾
百尺高灘數聲啼鳩攪得離懷醉新安天上夢隨明月千里

南浦 青溪送曹春臺遊燕

簾外有啼鶯向芳叢款款把春留住婪尾一尊開花前客都是天涯
倦旅灘聲正苦那堪重賦江淹句芳草如雲雲更遠黯淡越溪溪路
連宵山館閒眠送君行也擬挂颿歸去欲去又還休江南夢常繞
叢蘆細雨離情萬縷眼中怕見青青樹行矣扁舟風色緊莫待綠波
飛絮

念奴嬌 夜泊邗江有懷甲子舊遊寄華惇園

紅橋春霽記浮香點綴半林殘雪料峭東風扶翠袖人與瓊花雙絕
碎玉鳴箏眞珠結佩荏苒花間別樊川俊賞十年心事難說
試問

隔水房櫺連坡竹樹底處尋消息一角蕪城凝望久冷落鷗邊秋笛
脆葉驚飛荒雅過盡賸有空江月月高無寐繞船寒浪敲吧

唐多令 白下贈蘇小卿

蛾影曲池東青楊一巷風認伊家油壁曾逢側檻秋花和淚種渾不
減去年紅 小院小簾櫳閒眠細雨中恁新來酒病惺忪便不梳頭
偏嫵媚鎖鎖携手聽初鴻

甘州 盧龍立秋日賦

聽邊風蕭槭墜庭梧彈指發商聲正悲秋人在令支故壘孤竹荒城
射虎已成陳跡繞塞亂山青十載蹉跎意心與秋并 草色離離原
上似鏡中華髮漸次零星任帶圍瘦減劍氣拂雲平待幾時倩他賓
雁擊苔牋寄慰曝衣人憑渠說關河蒼茫斜日呼鷹

醉蓬萊 春明倦游南歸有日友人爲言管社山莊之勝殷殷

勸我卜鄰坡公所謂此心飄然已在太行之麓矣

過射湖西去積翠山阿是誰深隱玉展陂塘有潛鱗窺鏡怪石輪囷
長松礫硯寂歷無人境此景難忘此遊須果山靈應肯 買斷林巒
需錢幾萬抱我秋琴冷眠秋磴鷗若閒時來伴漁竿影屋似灑西田
如陽羨衣食粗相稱異日逢君閉門微雨夜厭厭飲

國香慢 題清微道人空山聽雨圖

閣住秋陰鎖翠屏幾疊窈窕雲心煙蘿乍霽冷雨瀟瀟遙砧琴欲訪飛
仙何處但天風吹佩泠泠重簾不須卷玉液流泉無此蕭森 半空
清梵記魚山入夢一穗燈青竹窗漸溼相對又到而今自滌紅絲小
研寫湘花澹墨疎馨芳華怕顛顛蓮漏如年也覺聲沈

曲遊春 將爲稽山鏡水之游鍾士奇餞別清尋閣閣畔海棠
一株相對離筵益增悽眷

曲折梅邊屋鎖一簾春寂幽事堪繪鳥喚提壺有晴雲入盃暖風吹
蕙玉立青衣婢算見慣不須回避任夜深翦燭藏鈎醉了又教重醉
此際勾留無計惜雙燕分飛單舸難繫綽約紅妝灑燕支萬點替
人吹淚月色沈瑤砌轉忘却別離情味更看閣外嬌花知他睡未

臺城路 西泠旅夜夢亡姬鮑季微同游冷泉亭上譚笑若平

生旣覺則山月回然不復成寐悲從中來篝鐙紀此

玉京杳絕人間路傷心鶴書難寄綠綺秋蕤青荷曉破漫許韋郎再
世雲沈水逝悵蕊佩伶仃九天風細寂寞餘香一襟幽恨向誰理
西泠乍來夢裏斷魂飛度處携手蕭寺伴我孤遊邀卿小坐寒月相
隨千里休彈別淚恐後夜重逢越添顛顛燈影涼移似聞黃葉墜

湘春夜月 月夜循孤山至蘇隄坐段橋上湖山曠寂清霜點

空俯仰悲懷忽下唐衢之淚

喚冰魂瘦筇扶月孤行
蹋碎滿地霜華依舊過西泠
不恨玉簫輕折恨段家橋畔
不是蓉城記昨宵短夢風裳
水佩直恁玲瓏 悲吟倚
柱層波黯淡山氣環青候雁
來時應倩問夜臺蹤跡何處
飄零三生石在漫先教拚却
今生但道還繞雙星遙望
芒鞋隱約鐘動南屏

法曲獻仙音 周香初雙雪脩相畫幀

蟬咽涼柯蛩吟秋井落葉更無人掃
露染空青月遮孤白冷然一磬
花杪正手搯烏絲譜陽春倚琴調
古音嫋問周郎幾番回顧較
撇笛蘆洲似添清峭便付與雙環
只可惜徵歌人老莫唱清商被
階下黃花暗惱抱枯桐自語又惹
鴉啼霜曉

解連環 錢香陬畫雲問女郎崔芸遺影於團扇扇卽崔物也

屬題其背

可人如月奈瑤臺欲下未圓先缺
歎幾許風絮因緣便久繫枝頭也

應愁絕三泖春空奈鏡裏韶華輕別數流年逝水錦瑟沈沈更無消息
花陰但聞啼鳩想魂返華陽洞天清閨掩寶扇眞箇乘鸞任蛛
網塵封粉消紈裂細認崔徽只約略當時嬌靨待秋墳一樽私酌野
棠自泣

綺羅香 題馬棣原倚雲亭填詞圖和楊芸士韻

豔雪晨融紅冰夜聚微度瑣窻花氣畫遍闌干都是別離情味把芳
思儘付清謳但疎影不堪重倚任枝頭賸馥零脂被風吹墮一池水
輕烟澹粉消歇尙有歌樓十四暗傾鉛淚羽換宮移紅豆舊情難
記便泥人嬌靨如花只贏得十分沈醉待春波携取瓊簫碧天呼月
起

長亭怨慢 試燈日薄遊邗上與芙蕖言別彈指春將半矣

訴離恨朝潮暮汐一鏡停空萬花無色記取春燈那回携手繡簾隙

翠眉低語難管束閒蹤跡後夜月兒圓奈人去如何圓得 波急向
蕪城西去黯惹柳絲如織玉人夢裏有羅帕爲春啼濕縱減了別後
芳姿定不減當時相憶看點點殘梅暖雨吹過江北

齊天樂

汪珊漁以新刊成容若全詞見寄並見懷齊天樂一
解卽和來韵答之

遙天盼斷征鴻影婁江尺書纔到雪屋爐紅梅窻夢白可似年時懷
抱吟邊懊惱是阻我清遊剡溪孤櫂試理湘絃要知絃外賞音少

殘芸幾番檢點納蘭今再世編就叢稿寶瑟生塵雕弧倚月我亦淒
涼同調花飛絮攪歎側帽風前玉鸞聲杳一閣秋蕪九峯青未了
惠
貫華閣爲容若南來時
與梁汾孫友輩吟眺處

甘州

錢塘王薌穀張松溪同舟往來江淮間倡酬甚樂繪篷
窗燭景圖屬題時松溪自爰浦還杭余與士美亦先後有西

冷之行

對江天旅思鎮無聊同倚木蘭橈趁蘆碕風起萸灣月上冷和瓊簫
一夢秋衾未醒小別咽寒潮抱影烏篷底蜜炬重燒我亦江淮流
浪慣鷗邊聽雨曲裏聞濤只幾番載酒短鬢惹霜毛恨春歸數聲鷓
鴒要尋來新綠段家橋依然到冷泉佳處挂取詩瓢

洞仙歌

洞天春曉聽步虛聲裏玉澗冷然奏流水到層崖路轉曲磴松迴塵
世外別有樓臺空翠樓中人窈窕素豔青蛾往日虛投漢皋佩若
道不多情小別移時又頻問閒遊何在待聞苑音書鶴迢迢便嬾上
琴絃暗彈清淚

卜算子慢

雨汎石湖用張子野韵

平波掠燕雜樹藏鶯雨織水天將晚鏡閣春空幾箇冷鷗船尾迴盼

恨垂楊久注青青眼奈化作飛花又化浮萍撩亂吹散
綠鳳桐華
館算幾日分携便同天遠莫道閒游雙槩載愁常滿聽寂寞行春橋
畔簫聲斷自白石老仙去後并小紅不見

馮 珍字子耕一字玉如號秋穀監生候選按察司照磨有尊古
齋集樊桐山館琴趣

滿江紅 春曉

昨夜梨雲鶯卷得東風剗地早又是殘花飛盡陰陰新翠細雨一庭
微有露曉寒幾陣涼於水卷珠簾風柳一絲絲飄來細 磨不盡年
時意消不去愁中味只零星舊夢記還重記蘭燼燒殘銀鴨冷流鶯
啼破文窗閉早朦朧聽遍賣花聲春人起

摸魚子 寄戴受茲

落殘紅一庭春瘦綺牕清露涼逼懨懨酒病人初醒遍數舊曾相識

愁欲絕算清迴南樓一棹剡浮隔闌干遍拍正蕉葉敲牕花枝掠檻
雲影半簾活 朦朧處幾點吳山難覓一種烟霧濃碧去年曾記深
宵語也算雪泥鴻跡燈更剔只似夢如塵此際難重憶胥江今夕有
幾折涼波一痕風縠分付亂愁織

甘州 題花間尋夢圖

鷓鴣繡簾艸色太淒淒庭院隔花幽是同遊春處簪聲記墮裙影曾留
今夕重尋舊夢闌角不勝秋檢點蠻箋在小字蠅頭 細認踏紅踪
跡聽一聲杜宇啼過妝樓剩當時涼月依舊照簾鉤且收拾殘脂零
粉卽說與花聽也替愁更惆悵棠梨如雪此意悠悠

陳 燮字叔理號秋史候補刑部司獄有寒碧軒集

清平樂 芸圃姪屬題花間尋夢圖

月斜風冷獨自穿花徑一角闌干橫樹影莫是夜深人凭 依然一

架薔薇香紅淡白都非借問新來蛺蝶壞裙幾幅能飛

菩薩蠻

相逢未覺殷勤甚醉來潛替深杯飲暗記可能諧同心頭上釵生
憎簾外雨抵死催人去去後不成眠燈花紅可憐

陳子諒字易齋燹從弟

蝶戀花 爲芸圃姪題花間尋夢圖

孤負韶光知幾許惆悵東風又是春將暮圓月一輪花外度依稀似
記曾遊路 惹得離愁紛若絮腸斷春宵夢也將愁去只是夢還無
覓處對花欲問花無語

陳佐猷 初名佐堯字又吾號攬洲燹兄子諸生有枝仁山館遺稿

拂霓裳 爲芸圃三弟題花間尋夢圖

月溶溶梨雲黯澹鎖簾櫳憔悴甚潘郎無語對東風三春心事嬾一

縷夢魂通睡朦朧憶隔花瞥見舊時容
雪泥鴻爪轉眼仍是空空
愁不盡者番難得又相逢衣香經雨散匣鏡半塵封悵離蹤這相思
一刻萬千重

陳 對字鏡墀號二白佐猷弟廩生有桐竹齋草

剔銀燈 爲芸圃三弟題花間尋夢圖

潘鬢經年憔悴好夢零星堪記依約花前分明燈下訴盡別離滋味
霎時驚起惱恨殺疏鐘古寺 正是三更天氣但見月痕滿地愁緒
如絲懽情似水說與花神一二夜深花睡恐不管人間閒事

陳三陞字翊辰號補堂佐猷弟候選府經歷有評月樓遺稿

蝶戀花 題芸圃三兄花間尋夢圖

一霎香魂何處去覓遍花間恹恍渾無據檢點殘詩縈別緒回看明
月仍如故 惆悵落花春又暮簾捲東風望斷天涯路花下相逢能

幾度可憐空挽同心縷

陳蕊元字芸圃一字子曼爨從子

瑤花 自題花間尋夢圖 并敘

春宵岑寂拋卷孤眠恍惚有人導入花叢見夢蘭內子輕妝
小立彼此泫然問予近日作何狀且云死生有命莫過情傷
出袖中二絕句相贈讀甫畢會侍婢驚覺淡月臨窗一鐙如
豆非復夢中光景也所贈詩惜僅記勸君莫悵春歸去一架
薔薇尙耐看之句於戲花間尋跡形影都無月下招魂啼痕
難認欲寫痴情爰倩丹青妙手藉慰愁緒希投珠玉佳篇時
癸亥上巳後也圖成調寄瑤花一闋

碧天如洗露溼花梢疑是廉纖雨畫簾繡幙齊捲起引出東風情緒
埋香黃土縱萬紫千紅誰主倚闌干認遍啼痕腸斷聲聲杜宇 者

番庭院淒涼問壓架薔薇開向何處心頭歷歷擬化作蛺蝶翩翩飛
舞殘詩重讀猶記得殷勤絮語想嫦娥替我銷魂故把一輪月吐

陳山壽

初名峙

字如南一字子玉燮長子有衆香奩詞稿

菩薩蠻 題芸圃三兄花間尋夢圖

吟聲隱隱穿花去分明只在花深處斜月照闌干粉墻人影寒 枝
搖風不定飄若驚鴻影眼見玉成烟看春春可憐

菩薩蠻

吳綾一幅秋如水索郎畫取鴛鴦睡翠蓋要深藏遮他小夢長 紅
絨衣上濺偏髻拖殘線無語又停針日長思殺人

清平樂 畫白荷花贈誦芬女僧

風斜雨細先做秋來意一隻鷺絲飛不起天水冥冥無際 蓼花的
的新妝菱花點點芳塘要問蒹葭苦蓮臺稽首空王

瑣窗寒 簾波

細織千絲低垂一桁小樓深處微風乍起吹皺縠紋縷縷盪春光微
茫可憐疊影圓痕能描否似盈盈一水飛花飛絮濺來無數 流去
閒庭宇正月影中央冥濛隔住是誰剪出半幅吳淞如許聽聲聲迎
風佩姍隱約淩波見微步瀉苔階一片空明不管吟蟲苦

掃花遊 苔縫

惜悴成片正繡徧庭心地衣凝翠沿堦沒砌乍鬢髮未滿一絲猶細
吹陣尖風剪破春痕有幾涼無次認亂髮乍梳分半挑起 三寸羅
襪底只鳳背鞦尖也應迴避行行且止怕忽忽踏損草芽花子細界
條條直似烏絲闌紙秋來矣老吟蛩此中身世

水龍吟

重午坐雨寄懷頻伽先生西湖

歌離弔夢無聊何人能會沈湘意屐聲門巷簷聲簾戶最添愁思芳

草萋萋長天黯黯慣驚游子問西湖今日淒涼孤館誰同伴誰同醉
舊侶高陽散矣歎飢驅漂零千里功名老大江關蕭瑟一般風味
湘淵舅氏客金陵荔生姑夫宦遊西江 鷗鳥前盟雞豚後約而今寒未想新詞賦罷銅
琵琶高唱吐英雄氣

陳山甫

初名峻

字穆如一字子仲號少眉燮次子候選從九品有真

意齋稿

憶蘿月

題芸圃三兄花間尋夢圖

花飛如雪小院吟聲絕堦下屐痕尋不得剛又薄雲籠月 記得人
在高樓忍寒同倚簾鈎一種綠陰如水那時未是春愁

陳益壽字子仙

憶蘿月

題花間尋夢圖

深深庭院人立闌干畔舊夢難尋愁轉展花影一庭鋪滿 香魂飄

渺隨風隔花寒月玲瓏莫上舊時妝
閣鏡奩經歲塵封

倪簡在字哦亭

意難忘 題花間尋夢圖

夜色微茫怪梨雲一片遮斷銀墻
綠窗寒漸透紅豆恨偏長
瞻遺掛 覓餘香誰共說
淒涼想從前它生有約此願須償
朦朧引入花塲
奈侍兒驚醒依舊空床
問花愁不語對月淡無光
尋舊夢意徬徨
獨立過昏黃
好相期明宵漏下重敍衷腸

吳承錫字蓉齋

鳳凰臺上憶吹簫 題花間尋夢圖

花炮燈檠月移牕罅
夢魂何處勾留是鳳臺
人杳重到秦樓依約眉
痕慘淡描不盡萬斛閒愁
闌干曲微吟絮語並控簾鈎
悠悠者番
夢醒依舊向妝臺
欲說無由祇衍波箋上
詩句堪搜無那離情縈繞

剩一半難上心頭知何日翩翩化蝶說與莊周

柳棄疾摩劍室隨筆花間尋夢圖殘冊十餘幅爲里人陳芸圃蕊
元悼其婦李嬾而作今已遺佚祇存題詞若干閱恐亦非全璧矣
余考徐達源梨里志列女傳載李嬾字子姍附貢生大有女少穎
悟通韻語適中表陳蕊元僅四載卒年二十五蕊元輯其詩得成
篇者六首曰夢蘭遺詩禊湖詩拾選其所作兩首遲芸圃不至云
最好清宵景闌干倚遍時腰因春去減人共月來遲花落三更夢
燈殘一局棋東風猶料峭坐久力難支偶成云廉纖細雨不成絲
一歲光陰去若馳庭有落花催婢拾詩無好句怕人知秋緣病久
驚偏早眉爲愁多畫轉遲且聽簾前雙燕語呢喃
也不比來時前一首亦見陸日愛松陵詩徵續編

笠澤詞徵

卷十四

百尺樓叢書

清

邑後學 陳去病輯錄

鄭

璜字元吉號瘦山嘉慶庚午舉人候補訓導有海紅華館詞

鈔

自序余稍知韻語即好為詞宋人中尤喜玉田白石兩家然

于火收拾餘燼附以近作共得二卷一日吳竈桐音一曰鱸鄉

敵唱中年哀樂人事多舛老病侵尋筆墨日頹宿好在是時復

犯綺語之戒從此焚香掃地以終餘年雖不

作可也道光十五年閏六月種墨庵主人書

百字令

題陳丈秋史寒碧軒圖和竹垞翁韻

梨湖卅里記浮家泛宅三年漂泊賴有元龍樓百尺肯讓寓公樓託

鳥喚提壺園開劇筍無此江鄉樂狂歌未了夕陽紅下籬落 曾見

萬綠陰中香茆縛屋斷手勞斟酌不許催租人到此一任燕穿簾幙

史詠袁安湘湄易譚郭象頻伽屢過閒林壑笑尋詩去瘦筇時繞亭

史詠袁安

湘湄

易譚郭象

頻伽

屢過閒林壑笑尋詩去瘦筇時繞亭

角丈有亭角
尋詩圖

金縷曲 題郭頻伽丈蠹螿冊子

變幻能如此問誰來書巢藝苑箇中游戲五色麻姑裙袂上試問芸
香熏未且小展春風雙翅慢笑景純非磊落卻怱怱未注蟲魚字小
爾雅合添記 書生結習蠅鑽紙最淒涼小窗開卷流螢乾死太息
滕王描寫後孰話羽陵舊事算蒼狗浮雲聊爾脈望成仙元未必只
蘧蘧略會蒙莊意真與假費摩揣

買陂塘 題嚴子容花底填詞圖

又東風一番妍暝濛濛絮影如許衣裳慘綠人年少况更登高能賦
花落去早紅雨迷離添了閒情緒子容所著為絮影樓詞嘗賦浣溪
沙云落花別是一般紅為頻伽先
賞生激攤箋無語算大白狂浮小紅低唱都付短長句 蘆洲外我亦
曾修笛譜換來兩鬢霜縷酒旗歌扇銷魂地只覺回頭多誤且小住

笑歲歲年年載酒江湖路倡予和汝恐側帽人歸故鄉春老寒到舊
盟鷺

齊天樂 荻莊觀桃花用蘅夢詞荻莊秋荷韻

兩三竹外春猶嫩略作去聲幾分晴意着袂香新隔簾笑淺恰似個人

妝洗東南風起恐紅雨濛濛滴成紅淚影亦堪憐湔裙綠縵一池水

多情司馬當日載航船一棹碧玉雙髻黃土淒涼青衫漂泊何況

斜陽人世銷魂此際奈小杜遲來書廊孤倚算只花枝見閒吟薄醉

往時嚴歷亭司馬屢招同湘湄鐵門
頻伽諸老輩宴集于此詩版猶存

水龍吟 西風作寒池上芙蓉一枝已半落矣詞以憐之

舊時臺榭依然沈吟又到闌干地一分夕照二分淺水三分寒意照
鏡顏低生塵鞮瘦恁般顛顛算者番來也不如不見但惹得新愁起
滿眼枯荷折葦問徐熙丹青能未鴛鴦夢斷蘆花頭白荒荒烟水

影事重尋微波難託可憐如此最相思池上人家一角小門深閉

鳳皇臺上憶吹簫 題姚棲霞女士翦愁吟

紫玉無年蘭香未嫁吟牋讀罷無聊想一燈俛影和淚輕挑自分新

愁難翦借柔毫細把愁描傷心處慵拈梅子怕聽芭蕉 難招芳魂

縹渺但埋玉深深草沒裙腰歎優曇命短不待花朝賸有零星斷句

蠶眠字雪琢冰雕誰同調疏香閣中一樣垂髻 疏香閣吾鄉葉小戀集名小戀沒時年亦

七十

無錫丁紹儀聽秋聲館詞話女士姚栖霞吳江人幼慧工詩時出新意年十七卒其父瘦吟岱取其燕翦翦愁愁不斷翻銜愁入小窻來句名所著為翦愁吟越百年郭頻伽鄭瘦山諸君為之刊行各倚鳳皇臺上憶吹簫調賦詞悼之其詩遂顯袁樸村景輅松陵詩徵言其填詞亦秀雅可誦並附杜丹滿庭芳斷句云但恐茶蘼開後風懷減誰共芳尊添愁恨紅妝淚洒無語暗消魂惜未錄全閔瘦吟亦工詩家極貧以筆耕餬口恆館于外清明有感一絕尤佳詩云林香漠漠艸萋萋水自東流日自西最是銷魂寒食節一庭花雨燕雙栖去病案詩徵所載斷句尙有問人閒富貴誰復如君九字又風懷減作風流褪與此微異

綠意 西湖春日步至南屏尋鴛鴦冢不得

模糊香土認斷腸一碧芳草春路埋玉深深抱玉沈沈柔魂知在何處憑誰喚醒楓根睡有蕭寺星星鐘語願祝他連理枝頭莫做妬花風雨 正是清明寒食紙灰斜照裏飄落無數松下同心橋下雙投癡絕古今兒女情生情死情何極又淚灑蹋青伴侶最悶人獨自

歸來卻向馬塍西去

何兆福高大姑俱西馬塍人

高陽臺 露筋祠

白鳥聲中白蓮香裏好風吹送秦郵一角靈旗叢祠燈火幽幽東廊欲認殘碑字早苔花蝕盡銀鈎可憐秋照水絲楊滿鏡眉愁 舒舒十里淮流記逐迎神簫鼓畫舫同遊留恨人間不將姓氏輕留小姑合向青溪住笑雙行癡女駢牛拜低頭約伴燒香見也應羞

前調 題李清照故宅漱玉井

碧鬢生寒銀瓶沈響費人多少徘徊燕子斜陽難尋舊日樓臺沈吟
漱玉詞中句想時時立損蒼苔正歸來萬卷堂中茶覆深杯而今
重問前朝事歎捲簾人去小劫飛灰剩水無波見誰玉虎牽回憑欄
怕向清流照照飄零絲鬢先催動愁懷一片西風黃菊還開

金縷曲 桃花塢過六如居士故居有懷其人爰賦此解

落日閒吟弔正無聊闔閭城外春風倚櫂茆屋數間而已矣著個狂
生尤好奈天與江湖潦倒第一風流三生案牘叢殘粉本零星稿人
去也世爭寶 旅霜容易梧枝老念當時蹋歌跳月淋漓酣叫待詔
才名京兆筆更有張郎年少算身後是非誰曉聽說因緣琵琶女只
桃花牆角如含笑又綠遍墓門草

祝英臺近

鳳釵欹蛾黛鎖小病甚時可手撥熏鑪留得一星火尋常丁字簾前

丁香花底只少箇丁孃同坐 最無那輸他雪色狸奴長傍繡墩臥
有限春光獨自悶中過思量問訊紅襟替將消息說今日東風還大

疏影 燈暈

雙枝一穗正團成夜色銅盤紅膩欲斷翻連乍缺還圓墮燼星星飛
碎無端幻出迷離影似天際美人虹媚結愁圍疊疊重重中有玉蟲
流淚 便把蘭煤手翦更爐香濃繞綰成心字暈碧裁紅轉綠迴黃
只是殢人殘醉薄侵粉臉光明滅愛畫裏耳珠添綴記宵闌同坐簾
櫳一陣落花風遞

摸魚兒 自題鱸鄉秋色圖

歎生綃曾逃劫火秋風斜日如昔三高祠宇相隣近誰更浮家汎宅
花四壁好著個圓盒坐對烟波白分鷗一席正出水魚肥經霜蟹大
楓葉夜來赤 江鄉景笑我年年拋擲舊游轉眼難覓垂虹亭下吹

簫處老却江南詞客歸不得展畫裏青山相見多慚色光陰可惜問
何日何時此中漁隱長與世情隔

高陽臺 九日同趙竹菴俞少甫朱條生登黑窑廠遠眺落木

天涯頗饒鄉思

日澹花黃風高雁白催成兩鬢星霜老去尋秋能消幾個重陽眼前
大有登臨地恨遮來疏柳行行太微茫幾點寒雅一片宮牆 詞人
當日行吟處有漁洋一老詩酒相羊銷歇風流更容我輩清狂支硯
雪瀑楞伽塔記歸時簫管橫塘忽停觴絕好西山不是江鄉

滿江紅 題巖澹生西域從軍圖

王粲從軍羨恰是終軍年紀數斥堠玉關西去萬三千里太古未消
蔥嶺雪尋源直度昆侖水問飛而食肉者何人元如此 受降書羊
皮紙草軍書烏皮几每沈沈深夜獨橫戈起驄粟早聞都尉號策勳

兼仗毛錐子况澆胸正有酒如泉葡萄紫

齊天樂 題巖比玉宜園詞隱圖卽送其入都

梧桐鄉裏詞人住湖山坐領逋峭春水干卿微雲誇壻難得少年才
調柳陰把釣繼故態狂奴漁家堪傲買斷陂塘微吟定側夕陽帽
黃河送君遠上旗亭看畫壁雙髻娟妙司馬頭銜聞鷄豪氣况半讀
書袁豹開圖一笑笑減字偷聲卅年同好載酒江湖鬢霜容易老

月華清 題廖裴舟菖湖草堂圖

箸滑蓴絲盤堆菱角五茸曾記停權如此園林但覺四時都好供詩
人點筆闌干是一幅天然畫稿清峭數遙山九點黛痕新掃 底事
頻年遠道負舊種梅花閒盟鷗鳥簾影窗光夜夜夢魂飛繞指平湖
歷亂風帆有天際歸舟多少須早恐穿將望眼倚閭人老

摸魚兒 題王竹嶼黃河歸權圖

障狂瀾全憑隻手長河千里如鏡路從八激灘頭過水暖桃花春信
乘畫艇聽搖舫船娘唱到風波定蓬窗小凭看饌入頰鱗醉邀紅友
今夜夢魂穩 歸去好渾似折腰陶令未荒松菊三徑太行黛色遙
相送不及六朝山影帆力正指一髮青中漸覺家鄉近烟波重認見
兩板柴門半江蘆荻早有白鷗等

念奴嬌 冀子得方鏡於山陰古墓中墓甌有天康年字蓋南
朝物也首賦此解余亦繼聲

西陵紅鬼問伊誰蠹殉墓磚空認入手寒芒紛四射照盡曉妝春影
眉蹙螺丸鬢雙蟬翼多少菱花恨六朝如夢六朝猶剩金粉 當日
衣捲秦宮鸞迴漢殿舊事堪重省魏晉齊梁斜照裏一例胭脂秋井
埋玉千年摸金一昔難喚香魂醒摩挲試想鬢圓何似苔暈

滿江紅 題吳漢槎故人塞外赤牘

幾幅蠻箋認細字半經磨滅蝕不盡模糊一片塞沙邊雪心事遠憑
蒼雁足悲歌痛飲黃鬢血想平安手札故鄉來燈花結 供涕淚班
侯筆同臥起蘇卿節歎今人管鮑寄書輕絕題壁倩孃魂夢斷歸吳
季子關門入展風前彷彿聽秋笳聲嗚咽

西子妝 春盡日泛舟湖上

乳燕啼晴流鶯破夢十百畫船都到碧雲如畫湖如鏡納羣峯黛眉
新掃萬花含笑恰相映箇人娟妙祝東風護花枝人面休教吹老
催歸權掠眼怱怱過了花神廟總留春在不多時且流連酒尊同醕
歌翻水調又重問煙波紅闌譜新詞醉踢斜陽側帽

掃花游 新正六日宴飲吳山道院時積雪初霽峭寒猶甚醉
後譜此以助豪情

吳山橫處趁浩浩長風跨來鸞背景光頓改早滕家試手翦冰相待

下地高天妙手空空難繪畫闌外訝眼底周遭四山何在 佳晨來
已再算載酒高寒者番尤最欵冠落珮判手撥雲烟口吞江海試問
羣公孰賦羣仙此會我真悔悔年年浪游塵壒

燕山亭 乙未春莫舟過松江憶與亡兄海山就醫來此已四

十餘年矣老病頽唐情懷惓惓不自覺詞之淒楚也

著個扁舟春水綠波幾日濃於草零落小桃燕子飛來渾不管東風
吹老獨坐長謳誰與共筆牀茶竈晴曉早九朶烟鬟一齊梳了 回
憶四十年前有話雨深宵唱喁同調霜點鬢絲淚滴鴿原重渡舊時
圓泖記取前塵算只有白頭鷗鳥吟稿怕難認斷鴻雪爪

浪淘沙 題董松筠表姨母涵清閣詩稿

燈火伴孤吟小閣沈沈牽蘿補屋卅年心霜下寒礎雲外笛欠此哀
音 滿紙淚痕侵畫荻灰深苦回甘味有而今子舍又添孫幾箇梧

竹成陰

葉 鑽字芳春號蘭潭又號蘭曇嘉慶戊辰恩科舉人方略館謄

錄候選知縣有香王館詩詞鈔

金縷曲 題金瑤岡一百二十本梅花書屋圖

一片寒雲繞記當時衆香國裏拈髭微笑二十年來清夢遠憶遍長
安春曉算總被軟紅塵擾人海風花看爛熟脫朝衫便理南歸棹青
篷底秋正好 詞人風格怒筠操指烟波重輪花中乞身還早百二
十株小別後真个者回修到鋤月處又添詩料一箇枝頭花萬朵數
花鬢借作仙籌校漫展卷認瑤島

往事層雲逗溯家聲金闥才子青箱能守年少花田懷古處吟到海

南壘白

君侍文簡公視學粵東時
著有南漢宮詞數十首

庾嶺下早圖清瘦一夢大羅人易

老紫微花空襯宮袍舊南枝寄何曾有 而今不剪春明韭打回帆

丹楓江上重尋園，叟料得新枝長過屋。簇遍苔錢如繡，種樹者關心甚否。新暑頭銜香雪裏，嚼殘英嬾試和羹。手且索笑巡簷走。

骨相饒風雅，宰官身清臞。相映依然儒者萬卷藏書手，自校玉軸牙籤。插架更癖到捫碑讀畫。此去窗櫺須再拓，補長春點綴梅花下。三徑客結耆社。生平清福享無價，撫鸞絃彈來鴻案。箏聲低亞一鳳槐陰早，振翮竹上。諸雛啞啞羨隱德。門楣吉迓屈指筵開金粟地。沸笙歌疊進長生。翠萊綵動御香惹。

僕誼叨桑梓，向京華閒雲無定飛來，便止一卷芳蘭才盥手。君出後簪花圖

屬又被古香沁齒濃麗，後清深若此五畝霜乾啼翠羽。隔苔垣我亦

師雄是二分屋本連址。余家荒圃與梅花書屋僅隔一牆鱸鄉亭外秋容賦束行

裝烟霞供養從今伊始如此家山不歸去，負却如花中子。便傳語衆花歡喜，姑射仙人綠華女。捧瑤觴久候琴書矣，待君至行塵洗。

沈 煥字章甫號星堂又號文伯道光五年乙酉舉人有絡雨齋
殘稿

金縷曲 寒繡

雪影支牀妥傍晶簾悄開紙帖鬢鴉低鞞底事年年營金線贏得錦
墩溫坐翻冷了絲情纏裏翠袖雙扶嬋娟影刺風尖生怯年紗窗停
片晌殘絨唾 熏爐息息埋餘火記昨宵新描格子並頭花朵剛欲
度針薑芽斂呵煖些兒纔可又瞥眼斜陽紅墮短晷工夫爭添減耐
須臾嬌倦仍無那拌漏永爲伊作

翁 雒字穆仲號小海

黃燮清云小海善繪尤精於草蟲神致
栩栩欲活爲世所珍詞則畫之餘也

南浦 秋水次張玉田春水韻

波靜淡煙澄浸遙空一鏡菱花常曉園檻盪涼陰池塘柳慵照眉痕
重掃伊人不見眼穿孤鶩天邊小新綠三篙曾送別又是荻苗如草

扁舟恍入香溪問南渠莫是芙蓉謝了

許渾詩何處芙蓉
落南渠秋水香

還有涉

江人圓渦動前日鞢羅親到予懷渺渺所思尤復增憂悄雙鯉魚書
風倘便還恐晚潮來少

袁廷珍字儒亨又字如亨號琴嶼郡道光十一年辛卯恩貢生有

琴嶼山房詞稿

月中行 夏夜

一庭如水浸玲瓏皎皎月當中姮娥今夜現全容萬里掃雲峯 憑
欄好把清光看看碧落又逗涼風笛聲何處問鳴蛩偏在我牆東

四和香 菱

翠婉紅嬌真旖旎按譜還名菱唱徹歌聲湖濱遞何處待佳人矣
四角雙雙三角異渺渺平湖曳只怕秋風今夜起多半落沉江底

滿江紅 題帶菴叔秋窗讀畫圖

點染玲瓏生花矣一枝彩筆叔工花鳥聊寓意圖中展卷輕綃重疊真竹

愛看文與可輞川欲問王摩詰好繪他瀟灑坐窗虛神飄逸 回首

想廿年別憶舊語從頭說叔自庚申秋之廿後復至閩於今二十有一年矣今冬侍笛生從祖入郡便道歸里

羨阮林風韻謝庭初日淅旬西窗頻剪燭拈題東閣將延月悵吟懷

前路促征帆音塵闊

袁廷瑞子敏成號芝菴又號字安廷珍弟諸生有翠珊軒詩餘

臨江仙 題范靜巖舅氏扁舟載書圖

碧水琉璃楊柳岸飄然一葉扁舟
柳娘嫵璘籍廣搜求三年帷下董半
夜杖扶劉 無忌虛名慙自負校讎未歷書城披圖緝帙也縱橫一
經綿手澤千軸繞吟聲

陳來泰字仲亨號訥庵諸生震澤有壽松堂詩集附詞一卷屠倅

因類傳而錄未錄門因錄門而交訂庵訂庵為錄門高足弟子所為詩思必深語必達前賢堂無所不窺而能自出機杼不

蘇東坡詩集卷之十一

以規撫為務卓然自立固不與時輩爭一日之長也
初庵嗜酒忤俗人目為狂其詩獨見稱儕輩客授杭郡最久名
流多結納與屠太守倬尤善居鄉往來者惟願兆芝徐瀚姚鳳
庶楊羲楊炳春數子而已余因楊氏兄弟交君入城輒共杯酒
庚寅三月君赴杭郡余同舟至平望縱譚上下古今至樂也
最後遇君郡城則已頽然老矣周之楨云先生系出湖州竹
墩沈氏吾邑沈春敷孝廉即其弟也國初徙居邑
城始冒陳姓下筆千言立就會刻壽松詩話四卷

卜算子 西湖泛月

夜色畫孤篷秋水鳴柔艣惆悵姮娥懶對人雲幕深深護 鐘響報

三更催客還歸去賴有漁燈數點明指出微茫路

玉團兒 頻婆果

酒邊試倩柔荑擘休認做黃橙綠橘幾度摩挲團團玉貌脂暈微赤

佳人北地真難得况說是婆心欲結那不相思扶頭慵起人正消

渴

八聲甘州 餞秋

憶西風浙瀝數番吹纔催暑成秋忽池荷盡卷隄楊全秃花漾蘆洲
漸覺山慵水嬾媚景一齊收只有多情燕欲去還留 舊日鶯簧蝶
板送東皇歸去了卻春愁又添來別恨蛩語數聲幽抱秋心最宜冷
淡經幾番摧挫日歸休歸何處指斜陽外葉滿山頭

朱瑞增字嘉木號靄亭一號庵摩例貢生有菴摩遺集

齊天樂 辛巳孟春集留雲仙館蘭叔妹丈出示罨書溪春泛

圖屬題率填此解

片飄盪出頗黎影溪光如此清曉浪蹙魚鱗船浮鴨嘴著個兩三人
少怎窮幽抱有袖底詩筒牕中茶銚半晌回頭紫藤兩岸吹殘了
髯蘇當時曾住記乞歸陽羨買田都好隄種梅花潭留玉女勝迹輸
君尋到只憑畫藁要評泊東風休將恹惺生怕重來春陰和夢老

丁兆寬

原名

字君度號石香又號若薊府學增生有綠杉野屋草

賣花聲 三月十三日書所見

瞥眼小紅樓依約簾鉤春風無賴賺人愁縱使綠楊遮不住也只休
休 眉史幾時修壓住眉頭果通眉語可含羞儻共浮眉山閣住鎮
日凝眸

臺城路 有序 和姬卿憐吳門人也色藝俱絕年十五爲王撫

軍 望侍妾迨王被逮妻子俱發披甲人爲奴卿憐以位列

小星不在遣例時大學士和 坤威權正盛蔣戟門侍郎 賜槩

以多金購送卿憐入府朝歌暮舞寵擅專房已未正月和又

被逮家資籍沒幸免妻孥姬乃返棹里門寂焉孤處回思往

事愁緒紛來因成二十二絕句以寫逮事情狀余玩其詩怨

而不怒真而可哀悲其遇之窮也爲題此闋

侯門枉說深于海繁華此時何處十斛量珠千絲結網選得閒房如

許蜨裳翠羽曾綺閣嬌歌玳筵低舞一霎滄桑伯勞東去燕西去
紅樓舊時伴侶總飄萍泊絮流烟散雨卅載沙搏兩番塵劫寫盡紛
紛愁緒花灣間坐歎頃刻人天宵長雨苦只有花鈴傍柱臺夜語

臺城路 題課子草

人生蘊露真如寄國頭死生海數劫五劫戈少年舞勺警事德家空
記當時快意但詞無庭前歲華庭內十載時空算此此外聽聞事

而今但存空砌展蒲編一卷辛酸揮淚陸弟庚弟周郎陳二河堤吳

基謝舅任竹吟侶飄零如駛依然此地奈人去堂空風光都異弱柳

兩莖又玉階闌麗

祝英臺近 題鄧尉集

擬頭船蘭葉槳蠻棹且攜酒繫艇垂楊曳杖負吾手試登雪海花山
分牋擊句早約得玉昆西亭金友少泉怎消受指點萬本梅花山

前更山後認取歸塗領略冷香久只合鑰脚煎茶船唇皮硯須學得
當年黃九

臨江仙 題鷗泛集

倒海翻江吳已沼悲哉人竟如漚浮家泛宅託扁舟一枝何處借十
里故鄉愁 往事不堪回首問他鄉半載淹留舊時賓榻舊時樓曾
經題壁處還籠碧沙不

百字令 題鳴歸集

奚囊檢點賦歸與携得兩家眷屬老屋三椽無恙在滿壁蝸涎猶縮
庭內爐烟庭前樹影位置仍如昨一番小劫飢來驅我奔逐 從此
偃息茅廬吟朋酒伴來往渾忘濁釀得村醪拌盡醉只合人生行樂
紫筍烹泉青梅侑酒也算神仙福百首新詩留題今已滿幅

滿江紅 題白下吟

萬里長江正一片夕陽明沒瞰金山古寺焦山殘碣千古關河勞孽
畫六朝歌管全銷歇卸征帆暮抵石頭城看江月 桃葉渡觥船窄
秦淮榭珠簾揭只舊時丁字簾前蛾眉成列花雨臺空詩境淨清涼
山遠吟鞭折笑歸來一領舊青衿何曾脫

王觀潮字湘筠諸生

沁園春 題心莊姪倚雲姪婦金海樓合稿

如海花光延入樓頭唱酬有情看琴囊畫譜清才三絕繡襦甲帳豔
福三生寫韵毫柔畫眉墨馥琢月雕雲一對人罡風到奈芳蘭陡折
鏡破釵分 文簫跨虎先行怎拋却離鸞負舊盟想神仙眷屬難留
下界海天樓閣重證前因埋玉草深聯珠編在傳遍詞壇冀賞音酸
辛甚倘秋墳唱出定是雙聲

南樓令 題袁協銓秋燈伴讀圖

秋雨隕瑤華秋燈冷碧紗這心情愁煞秦嘉幻入崔徽圖書裏教認
取舊兒家 人面去天涯重摩兩鬢鴉上新絃聲調俱佳底事故琴
猶戀着邢尹妬要防些

惜分飛

題深院梨花燕獨歸圖

一桁梨花微著雨閒煞春光幾許燕子愁人緒傍樓故作呢喃語
記得年時無偶去尙帶紅絲細縷商略吟詩句拈毫小立雲深處

金作霖字邦榮又字子績號甘叔諸生

震澤籍

賀新郎 張滄嶼沅吉席

畫出常筵喜看幢幢燭花開處也都並蒂小費檀郎吟管力商略埽
眉樣子倘摹取君家舊史剛好窺簾纖月影又隔湖遙送雙峯翠儘
供給描螺黛 憶曾豔說逢場戲恁深情釵頭指鳳芳名暗記遮莫
天花春似海爭及藍橋仙儷試料理催妝吟思領略四聲新譜妙讓

金閨添個紅羅幘怕才調還師事

韓森寶一名生寶字頌伯號茶甫諸生震澤有茶甫詞存一卷

金縷曲 秋感

葉落梧桐矣鎮無聊一番疎雨文園病起風捲水晶簾半幅秋到白
荷花裏憶舊日落花天氣兔走烏飛無百日忽容顏換得癯如此鏡
中影可憐耳 筆牀茶竈天隨子署頭衙筆間漁父簾中窮士熱不
因人心自定休管臣門如市也莫問浮瓜沈李手執團團明月扇聽
鳴蟬高柳聲聲沸北窗下臥而已

闌干萬里心 簡周祖白

彎彎月挂柳梢頭曲曲溪划雙槩舟有客憑闌盟白鷗兩重樓一樣
蕭疎各自愁

百字令 題屈笏堂大別豪吟圖

滔滔江漢想沈沙折戟戰爭多少今日山頭問眺望且對青天長嘯
夏口東瞻武昌西望只有風帆好賦詩橫槊阿瞞可有同調歎息
搥鼓狂生登樓詞客一例埋秋草漫把傷時才子淚付與丁作亂峯
斜照家住吳頭身遊楚尾千里關山道長歌當哭丁作有情天亦
應老

王錫瓊字雲潔

買陂塘 題徐北海蓴菜畫冊

最關心一番風雨龍山湖水無際枝枝葉葉飄零慣誰畫水鄉風味
儂驩喜盪一箇船兒兩槳揮春水凌波捲袂便滑澹拈來清香無比
佐我晚來醉 江湖興昔日知音能幾吾家花外會記王沂孫花外集有蓴菜詞
相思羅帶同心結芽捲小緘芳字憑誰寄且付與廚娘配合些鹽豉
一平行作吏時君方有烏背魚鮮馬蘭頭嫩俊味重思否鰱魚以

為佳馬蘭頭菜名皆
春時吳江鄉味也

陸日勳

原名

字元方號花村一號守瓶諸生

震澤籍

有辛夷花館稿

勸金船 題徐北海蓴菜畫冊

五湖三泖瀾漫裏釵股叢叢翠蔓生
鮞躑參差漾似建康千里言采
其茆恰值秋風已起憑弔當年張翰蒼茫烟水
松陵徐穉多情意
倩畫師圖畫為儂寫江南風味却問伊何事
酷嗜蓴羹只為淡而彌
旨也算曾家羊棗屈家菱芰

邱曾詒字子謙府庠優附生議敘八品職銜

探春慢 花朝過勝溪艸堂留宿明日賦此
和蒔庵

陌上晴開樓頭夢覺

入聲

昨宵詩債纔了

蒔庵詩余于枕上和之

村擁癡雲野舍

膏雨釀得春光未老紅紫新詞鬪比殷
七花開更巧幾杯潤到枯腸
心肝嘔出多少 作戲逢場也好任聚散
萍踪霎時昏曉汾酒澆殘

梨雲望斷題壁只留鴻爪最是多情處今夜裏月痕皎皎又訂明年

武林唱和游艸與蔣庵約明春同作西湖之遊

高陽臺 用紫玖弟韵

邱錦紅殘江花豔落深嬾壯不如人白首填詞肯耽竹垞閒情東施

枉自將顰效怎狂言無佛稱尊假和真蝶競探芳鶯老比隣 光陰

花甲忽忽度恁逃禪自懺未滌心塵人日題詩壁間墨瀋猶存竭來

舊雨翻新調唱曉風柳七吟春春朝蔣庵有詞索和指明鐙那个知音那个迷

津

徐錫第字雲楣號蘭叔國子生浙江候補府經歷去病案蘭叔為朱謫亭從妹婿

其配萼增字沁香亦工詩惜不永年

剔銀鐙 題夢鷗閣圖

十里烟波浩宕中有一樓高敞野蓼垂紅荒蘆飛白幾處歌聲漁榜

此非塵響合付與閒鷗清賞 記打分湖雙槩載酒屢經還往惱我

無緣尋君有夢披卷如親幽幌秋高乘爽快登臨一層更上

郭 棹字少蓮諸生

去病案少蓮爲類伽之姪而丹叔之第三子也居嘉善故或稱嘉善人嘗題許銓夢鷗閣

圖云全家昔日住分湖今日追思似畫圖試向湖中間客問可還記得舊盟無蓋其於故鄉固尙有未能忘情者在也詩詞亦具有家風惜不多見耳

臺城路 題南湖柳隱圖

東風吹得春潮長絲楊綠垂千縷嫩色藏雅輕煙鎖岸好景南湖深

處主人此住正招隱裁詩閒居成賦世外交游漁兄漁弟共來去

柴門如在畫裏羨書倉坐擁兼富佳箸挈鷺提鷗分題選韵長作騷

壇盟主先生倘許願青眼同垂算爲吟侶更擬拏舟北窗來聽雨

儂家舊向汾湖住湖中亦多佳景漁唱邀涼鶯啼送曉助我吟情詩

興水窗偶凭見沙鳥依人野航泛影嫩柳垂絲晚風吹起落煙暝

移家今已卅載嘆萍踪未定鷗夢多冷一片煙波三間老屋不省誰
爲管領私心自忖欲拋去團瓢換來漁艇捕蟹撈蝦共君湖上隱

王與沂字英初號瘦梅更號賦梅道光十五年乙未歲貢生

震澤籍

咸豐庚申殉難

去病案先生少游京國旋返鄉里一意教授多所造就曾建文星閣于梓潼觀東並精舍三楹

爲靈瑩室講藝于中兵燹後其弟子吳望雲祭酒費我庵中允復修之並移三高祠于閣左建樓祀之卽今西門外鱸鄉亭也

疏影 湯雨生都督囑題寫梅樓圖

綺窗小拓正簷前索笑香綻寒玉淡墨勻調矮紙量裁摹出雪中橫
幅修眉天與生花管羨此福幾生修足更莫須夢到羅浮重喚翠禽
同宿 聞道孤山處士有巢居故址今又新築大好主持詞賦參軍
烟月而今相屬合家仙眷安排了只少箇眠堦老鶴乞一枝割取吳
納伴我客窗幽獨

笠澤詞徵卷十四

完

中華民國四年八月付印
中華民國四年十月出版



版權
所有

編者
兼
發行人

陳去病

印刷者

上海六馬路東新橋北首吉慶坊內
國光書局印刷所

發行所
上海拋球場北轉四寶波路
國學保存會

上海棋盤街
廣益書局

上海六馬路東新橋北首吉慶坊內
國光書局印刷所

上海北泥城橋新馬路白克路
競雄女學校

笠澤詞徵百尺樓叢書

定價金五角